

Namo tassa bhagavato arahato sammāsambuddhassa.

Visuddhimagga nidānakathā

Visuddhimaggo nāmāyaṃ gantho piṭakattayasārabhūto sakalaloke paṭipattidīpakaganthānaṃ aggo hoti seṭṭho pamukho pāmokkho uttamo pavaro cāti viññūhi pasattho. Tattha hi saṅgītittayārūḷhassa tepiṭakabuddhavacanassa atthaṃ saṃkhipitvā sikkhattayasaṅgahitaṃ brahmacariyaṃ paripuṇṇaṃ pakāsitaṃ suvisadañca. Evaṃ pasatthassetassa visuddhimaggassa **nidānakathā**yapi bhavitabbameva. Tasmādāni tampakāsanatthamidaṃ pañhakammaṃ vuccati –

“So panesa **visuddhimaggo** kena kato, kadā kato, kattha kato, kasmā kato, kimatthaṃ kato, kiṃ nissāya kato, kena pakārena kato, kissa sakalaloke patthaṭo”ti.

Tattha **kena katoti** ācariyabuddhaghosattheravarena tepiṭakasaṅgahaṭṭhakathākārena kato.

Kadā katoti amhākaṃ bhagavato sammāsambuddhassa sakalalokanāthassa parinibbutikālato pacchā dasame vassasatake (973 -buddhavassee) kato.

Kattha katoti sīhaḷadīpe anurādhapure mahāvihāre kato.

Kasmā katoti visuddhikāmānaṃ sādhujanānaṃ tadadhigamupāyaṃ sammāpaṭipattinayaṃ ñāpetukāmatāsankhātena attano ajjhāsayaena sañcoditattā, **saṅghapālatherena** ca ajjhesitattā kato.

Ettha pana ṭhatvā ācariyabuddhaghosattherassa uppatti kathetabbā, sā ca **mahāvamse** (cūlavamsotipi voharite dutiyabhāge) sattatiṃsamaparicchede pannarasādhikadvisatagāthāto (37, 215) paṭṭhāya bāttiṃsāya gāthāhi pakāsītāyeva. Kathaṃ? –

Mahāvamsa-buddhaghosakathā

215. **Bodhimaṇḍasamīpamhi**, jāto **brāhmaṇamāṇavo**;
Vijjā-sippa-kalā-vedī, tīsu vedesu pāragū.

216. Sammā viññātasamayo, sabbavāDavisārado;
Vādatthī jambudīpamhi, āhiṇḍanto pavādiko.

217. Vihārameka’ māgama, rattim pātañjalīmatam;
Parivatteti sampuṇṇa-padam suparimaṇḍalam.

218. Tattheke **revato** nāma, mahāthero vijāniya;
“Mahāpañño ayaṃ satto, dametuṃ vaṭṭati”ti, so.

219. “Ko nu gadrabharāvena, viravanto”ti abravi;
“Gadrahānaṃ rave atthaṃ, kiṃ jānāsī”ti āha taṃ.

220. “Ahaṃ jāne”ti vutto so, otāresi sakaṃ matam;
Puṭṭhaṃ puṭṭhaṃ viyākāsi, viraddhampi ca dassayi.

221. “Tena hi tvaṃ sakaṃ vāda-motārehi”ti codito;
Pāḷi’ māhā’ bhidhammassa, attha’ massa na so’ dhigā.

222. Āha ‘‘kasse’sa manto’’ti, ‘‘buddhamanto’’ti so’bravi;
‘‘Dehi metam’’ti vutte hi, ‘‘gaṇha pabbajja tam’’iti.
223. Mantatthī pabbajitvā so, uggaṇhi piṭakattayaṃ;
Ekāyano ayaṃ maggo, iti pacchā ta’ maggahi.
224. Buddhassa viya gambhīra-ghosattā naṃ viyākaruṃ;
Buddhaghosoti ghoso hi, buddho viya mahītale.
225. Tattha **ñāṇodayaṃ** [ñāṇodayaṃ nāmapakaraṇaṃ idāni kuhiñcipi na dissati;] nāma, katvā pakaraṇaṃ tadā;
Dhammasaṅgaṇiyākāsi, kacchaṃ so **aṭṭhasāliniṃ** [idāni dissamānā pana aṭṭhasālinī sīhaḷadīpikāyeva; na jambudīpikā; parato (54-55 piṭṭhesu) esa āvibhavissati].
226. **Parittaṭṭhakatha**ñceva [parittaṭṭhakathanti piṭakattayassa saṅkhepato atthavaṇṇanābhūtā khuddakaṭṭhakathāti adhippetā bhavesu], kātuṃ ārabhi buddhimā;
Tam disvā revato thero, idaṃ vacanamabravi.
227. ‘‘Pāḷimattaṃ idhānītaṃ, natthi aṭṭhakathā idha [ettha sagībhittayārūḷhā moggaliputtatissattherassa santikā uggahitā sissānusissaparamparātātā mūlaṭṭhakathā kasmā jambudīpe sabbaso antarahitāti vimamsitabbaṃ];
Tathācariyavādā ca, bhinnarūpā na vijjare.
228. Sīhaḷaṭṭhakathā suddhā, **mahindena** matīmatā;
Saṅgītittayaṃārūḷhaṃ, sammāsambuddhadesitaṃ.
229. Sāriputtādigītañca, kathāmaggaṃ samekkhiya;
Katā sīhaḷabhāsāya, sīhaḷesu pavattati.
230. Tam tattha gantvā sutvā tvam, māgadhānaṃ niruttīyā;
Parivattehi, sā hoti, sabbalokahitāvahā’’.
231. Evaṃ vutte pasanno so, nikkhamitvā tato imaṃ;
Dīpaṃ āgā imasseva [idassevāti imasseva mahānāmarañño kāle 953-975 buddhavassee; ayañca vassaparichedo sīhaḷarājavamsaṃ nissāya dassito; yuropiyavicakkhaṇānaṃ pana matena 941-964 buddhavassee iti vedītabbo; evamuparipi;], rañño kāle mahāmati.
232. Mahāvihāraṃ sampatto, vihāraṃ sabbasādhunaṃ;
Mahāpadhānagharaṃ gantvā, **saṅghapālassa** santikā.
233. Sīhaḷaṭṭhakathaṃ sutvā, theravādañca sabbaso;
‘‘Dhammassāmiṣṣa esova, adhippāyo’’ti nicchiya.
234. Tattha saṅghaṃ samānetvā, ‘‘kātuṃ aṭṭhakathaṃ mama;
Pothake detha sabbe’’ti, āha, vīmaṃsitaṃ sa tam.
235. Saṅgho gāthādvayaṃ tassa’ dāsi ‘‘sāmatthiyaṃ tava;
Ettha dassēhi, tam disvā, sabbe demāti pothake’’ [234-5 gāthāsu ayamattthayojanā– ‘‘tattha mahāvihāre saṅghaṃ mahānetvā saṅgha sannipātaṃ kāretvā ācariyapubbaddhaghoso evamāha ‘aṭṭhakathaṃ kātuṃ sabbe pāḷi-aṭṭhakathā-pothake mama dethā’ ti; so saṅgho tam vīmaṃsitaṃ saṃyuttanikāyato ‘antojaṭṭhā’ tiādikam ca ‘sīle patiṭṭhāyā’ tiādikam cāti gāthādvayaṃ tassa adāsi ‘ettha tava sāmatthiyaṃ ñāṇappabhāvaṃ dasseti; tam disvā sabbe

potthake demā'tivatvā'ti; iminā pana ayamatthā dassito hoti "ācariya buddhaghoso visuddhimaggam karonto tadeva gāthādvayam oloketvā, kiñcipi aññam potthakam anoloketvā akāsī'ti; tassa panatthassa yuttāyuttavicāraṇā parato (39-49-piṭṭhesu) āgamissati].

236. Piṭakattaya'mettheva, saddhim aṭṭhakathāya so;
Visuddhimaggam nāmā'kā, saṅgahetvā samāsato.
237. Tato saṅham samūhetvā, sambuddhamatakovidam;
Mahābodhisamīpamhi, so tam vācetu mārabhi.
238. Devatā tassa nepuññam, pakāsetum mahājane;
Chādesum potthakam sopi, dvattikkhattumpi tam akā [238 gāthāya ayamattho— "devatā tassa buddhaghosassa nepuññam nipuṇaññāppasāvam mahājanassa pakāsetum tena likhitam visuddhimaggapotthakam chādesum paṭicchādetvā apassiyabhāvam pāpetvā ṭhapesum; sopi buddhaghoso dutiyampi tam likhi, tampi devatā chadesum; tatiyampi likhī'ti; tena vuttam "dvattikkhattumpi tam akā'ti; idameva mahāvamsavacanam nissāya vittāretvā kathitāya buddhaghosuppattiyā nāma kathāla ekaratteneva visuddhimaggassa tikkhattumpi likhitvā niṭṭhāpitabhāvo pakāsito; īdisī pana kathā bahūnam vimhayajananīpi parikkhakānam saṃsayajananī hoti; tasmā imissāpi vicāraṇā parato (47-8-piṭṭhesu) dassiyissati].
239. Vācetum tatiye vāre, potthake samudāhaṭe;
Potthakadvaya'maññampi, saṅṭhapesum tahiṃ marū.
240. Vācayimsu tadā bhikkhū, potthakattaya'mekato;
Ganthato atthato vāpi, pubbāparavasena vā.
241. Theravādehi pālīhi, padehi byañjanehi vā;
Aññathattamahū neva, potthakesupi tīsupi.
242. Atha ugghosayī saṅho, tuṭṭhahaṭṭho visesato;
Nissamsayam'sa **metteyyo**, iti vatvā punappunam.
243. Saddhim aṭṭhakathāyā'dā, potthake piṭakattaye;
Ganthākare vasanto so, vihāre dūrasānkare.
244. Parivattesi sabbāpi, sīhaḷaṭṭhakathā tadā;
Sabbesam mūlabhāsāya, māgadhāya niruttiyā.
245. Sattānam sabbabhāsānam, sā ahosi hitāvahā;
Theriyācariyā sabbe, pālīm viya ta'maggahum.
246. Atha kattabbakicesu, gatesu pariniṭṭhitim;
Vanditum so **mahābodhim**, jambudīpaṃ upāgamī'ti [so mahābodhi vanditum jambudīpaṃ upāgamīti idam vacanam purimavacanehi asaṃsaṭṭham viya hoti; pubbe hi "ācariyabuddhaghoso bodhimaṇḍasamīpe jāto'ti ca, "sīhaḷadīpaṃ gantvā sīhaḷaṭṭhakathāyo māgadhabhāsāya parivatthēti tassācariyena revatatherena vutto'ti ca vuttam; tasmā idhāpi ācariyabuddhaghosassa pavatti tadanurūpā "tā bhāsāparivattitaṭṭhakathāyo ādāya sāsānujotanatham jambudīpaṃ upāgamī'ti evamādinā sāsānujotanamūlikā eva bhavitum arahati, na pana mahābodhivandanamūlikāti].

Ayañca pana mahāvamsakathā 1950 - kharistavasse **hābadamahāvijjālayamuddaṇayante** romakkharena mudditassa visuddhimaggapotthakassa purecārikakathāyam "anekānettha atthi

vicāretabbānī”ti vatvā **dhammānandakosambīnām**akena vicakkhaṇena vicāritā. Tamettha yuttāyuttavicinanāya dassetvā anuvicāraṇampissa karissāma.

Jātidesa vicāraṇā

1. Tattha hi tena **dhammānandena** “buddhaghoso bodhimaṇḍasamīpe (buddhagayāyaṃ) jātoti na yuttameta”nti vatvā taṃsādhanatthāya cattāri byatirekakāraṇāni dassitāni. Kathaṃ?

(Ka) “buddhaghosena pakāsitesu taṃkālīkavatthūsu ekampi taṃ natthi, yaṃ magadhesu uppanna”nti paṭhamam kāraṇam dassitam. Tadakāraṇameva. Ācariyabuddhaghosatto hi saṅghatthakathāyo karonto porāṇatthakathāyoyeva saṃkhipitvā, bhāsāparivattanamatena ca visesetvā akāsi, na pana yaṃ vā taṃ vā attano diṭṭhasutaṃ dassetvā. Vuttañhetam ācariyena –

“Saṃvaṇṇanam tañca samārabhanto,
Tassā mahāatthakatham sarīram;
Katvā mahāpaccariyam tatheva,
Kurundināmādisu vissutāsu.

Vinicchayo atthakathāsu vutto,
Yo yuttamattham aparicajanto;
Athopi antogadhatheravādam,
Saṃvaṇṇanam samma samārabhissa”nti [pārā. attha. 1.ganthārambhakathā] ca.

“Tato ca bhāsantameva hitvā,
Vitthāramaggañca samāsavitvā;
Vinicchayam sabbamasesavitvā,
Tantikkamam kiñci avokkamitvā.

Suttantikānam vacanānamattham,
Suttānurūpam paridīpayanti;
Yasmā ayam hessati vaṇṇanāpi,
Sakkacca tasmā anusikkhitabbā”ti [pārā. attha. 1.ganthārambhakathā] ca.

Yatheva ca ācariyabuddhaghosena attano atthakathāsu taṃkālīkāni māgadhikāni vatthūni na pakāsītāni, tatheva sīhaḷīkāni dakkhiṇāndiyaratthikāni. Na hi tattha **vasabharājakālato** (609-653 - buddhavassa) pacchā uppannavatthūni diṭṭhāni ṭhapetvā **mahāsenarājavatthum** [pārā. attha. 2.236-237], ācariyo ca tato tisatamattavassehi pacchātare **mahānāmarāṇṇo** kāle (953-975-bu-va) sīhaḷādīpamupāgato. Tasmā atthakathāsu taṃkālīkamāgadhikavatthūnam appakāsanamattena na sakkā takkattā na māgadhikoti ñātunti.

[Kha] punapi tena “sabbesupi buddhaghosaganthesu uttarāndiyadesāyattam paccakkhato diṭṭhassa viya pakāsanam natthi”ti dutiyam kāraṇam dassitam. Tassapi akāraṇabhāvo purimavacaneneva veditabbo. Apica **sāratthappakāsiniyā** nāma saṃyuttaatthakathāyaṃ, **sumaṅgalavilāsiniyā** nāma dīghanikāyatthakathāyañca vuttasaṃvaṇṇanāyapi veditabbo. Tattha hi –

“Yatheva hi kalambanadītūrato rājamātuvihāradvārena thūpārāmaṃ gantabbaṃ hoti, evaṃ hiraññavatīkāya nāma nadiyā pārimatūrato sālavanam uyyānam. Yathā anurādhapurassa thūpārāmo, evaṃ taṃ kusinārāya hoti. Thūpārāmato dakkhiṇadvārena nagaram pavisanamaggo pācīnamukho gantvā uttarena nivattati, evaṃ uyyānato sālapani pācīnamukhā gantvā uttarena nivattā. Tasmā taṃ upavattananti vuccati”ti [saṃ. ni. attha. 1.1.186; dī. ni. attha. 2.198] –

Paccakkhato diṭṭhassa viya pakāsanampi dissateva. Tampi pana porāṇaṭṭhakathāhi bhāsāparivattanammattamevāti gahetabbaṃ, tādīsāya atthasaṃvaṇṇanāya mahāmahindattherakālatoyeva pabhuti vuttāya eva bhavitabbatīti.

[Ga] punapi tena “uṇhassāti aggisantāpassa, tassa vanadāhādīsū sambhavo veditabbo”ti **visuddhimagge** (1, 30-piṭṭhe) vuttasaṃvaṇṇanaṃ pakāsetvā “tassā panassa avahasaṇiyabhāvo pākaṭoyevā”ti ca hīletvā “indiyaraṭṭhe pana uttaradesesu gimhakāle vatthacchādanarahitā mānusakāyacchavi sūriyasantāpena ekamsato dayhati, taṃ na jānanti dakkhiṇāindiyadesikā”ti tatiyaṃ kāraṇaṃ dalhatarabhāvena dassitaṃ. Tattha pana yadi “sūriyasantāpena ekamsato dayhatī”ti etaṃ ujukato sūriyasmisantāpeneva daḍḍhabhāvaṃ sandhāya vucceyya, evaṃ sati **ḍamsamakāsavātātapasarīsapasamphassānanti** pade **ātapasaddena** samānatthattā na yuttameva. Yadi pana sūriyasantāpasañjātena uṇhautunā daḍḍhabhāvaṃ sandhāya vucceyya, evaṃ sati uttarāindiyadesesu, aññattha ca tādīsesu atiuṇhaṭṭhānesu sūriyasantāpasañjātassa uṇhautuno paṭighātāya cīvaraṃ senāsanañca paṭisevīyatīti ayamatto na na yutto. Tathā hi vuttaṃ **vinayaṭṭhakathāyaṃ** (3, 58)

“**Sītaṃ uṇhanti** utuvisabhāgavasena vutta”nti.

Sā pana visuddhimagge padatthasaṃvaṇṇanā porāṇasuttantaṭṭhakathāhi āgatā bhaveyya. Tathā hi vuttaṃ **papañcasūdaniyā** nāma majjhimanikāyaṭṭhakathāya **sabbāsavasuttavaṇṇanāyaṃ** (1, 58) “**uṇhanti** cettha aggisantāpova veditabbo, sūriyasantāpavasena panetaṃ vatthu vutta”nti. Ettha ca sacāyamattho ācariyena attano mativasena vutto assa, tassa vatthussa porāṇaṭṭhakathāyaṃ vuttabhāvañca tassā atthasaṃvaṇṇanāya attano matibhāvañca yuttabhāvañca pakāseyya. Ācariyo hi yattha yattha porāṇaṭṭhakathāsu avuttatthaṃ visesetvā dasseti, tattha tattha tādīsaṃ ṇāpakavacanampi pakāsetiyeva, yathā **sumaṅgalavilāsiniyaṃ** (1, 72) “ettha āṇattianissaggiyathāvarāpi payogā yujjanti, aṭṭhakathāsu pana anāgatattā vīmaṃsitvā gahetabbā”ti vacanaṃ, yathā ca **papañcasūdaniyaṃ** (1, 30) “avicāritametam porāṇehi, ayaṃ pana attano matī”ti vacanaṃ. Na cettha kiñcīpi ṇāpakavacanam pakāsitaṃ. Tasmā “yadetam ‘**uṇhassāti** aggisantāpassā’ti ca, ‘**uṇhanti** cettha aggisantāpova veditabbo’ti ca vacanaṃ, etaṃ porāṇasuttantaṭṭhakathāvācana”nti veditabbanti.

(Gha) punapi tena “**papañcasūdaniyā** nāma majjhimanikāyaṭṭhakathāyaṃ **gopālakasuttaṃ** saṃvaṇṇento [ma. nī. aṭṭha. 1.350] buddhaghoso ‘magadhavidēharaṭṭhānaṃ antare gaṅgāya nadiyā majjhe vālukatthaladīpakā atthī”ti saddahati maññe. Buddhaghosena pana diṭṭhagaṅgā sīhaḷadīpe mahāveligaṅgāyeva, na pana indiyaraṭṭhikānaṃ seṭṭhasammaṭā mahāgaṅgāti pākaṭoyevāyamatto”ti catutthaṃ kāraṇaṃ dassitaṃ. Taṃ pana idāni mahāgaṅgāya majjhe tasmim ṭhāne tādīsaṃ dīpakam adisvā “pubbepi evameva bhaveyyā”ti ekamsato gahetvā vuttavacanammattameva. Nadiyo pana sabbadāpi tenevākārena tiṭṭhantīti na sakkā gahetunti pākaṭoyevāyamatto. Tasmā yathā pubbe tassa gopālassa kāle tasmim ṭhāne majjhe gaṅgāya tādīsā dīpakā saṃvijjamānā ahesuṃ, tatheva porāṇaṭṭhakathāsu esa attho saṃvaṇṇito, tadeva ca vacanaṃ ācariyena bhāsāparivattanam katvā pakāsitaṃti evameva gahetabbaṃ. Tasmā tampi akāraṇamevāti.

Brāhmaṇakulavicāraṇā

2. Atha “brāhmaṇamāṇavo”ti padampi tena evaṃ vicāritaṃ –

(Ka) “buddhaghoso ‘brāhmaṇakulajāto’ti na sakkā gahetuṃ. Kasmā vedakālato paṭṭhāya yāvajjatanā sabbepi brāhmaṇā

Brāhmaṇosya mukhamāsīdi, bāhū rājanya? Kata?;

Ūrū tadasya yada vāgya?, Padbhyāṃ gūdro ajāyatā”ti [irurveda, 10-maṇḍala, 90; tathā athava 6 veda 19, 6, 6].

Imaṃ **purisasuttaṃ** nāma mantam jānantīti saddahiyā.

Ayaṃ panassā attho – ‘brāhmaṇo assa (brahmuno) mukhaṃ āsi. Bāhū rājañño kato, khattiyā assa bāhūti vuttam hoti. Yo vesso, so assa ūrū. Suddo assa pādehi ajāyī’ti.

Buddhaghoso pana ‘paṇḍitabrāhmaṇo’ti nātōpi tam gātham na aññāsi. Tathā hi tena **bandhupādāpaccāti** padassa atthavaṇṇanāyaṃ ‘tesam kira ayaṃ laddhi – brāhmaṇā brahmuno mukhato nikkhantā, khattiyā urato, vessā nābhito, suddā jānuto, samaṇā piṭṭhipādato’ti [[dī. ni. atṭha. 1.263](#); [ma. ni. atṭha. 1.508](#)] tissā vedagāthāya asamānattho vaṇṇito’ti.

Ayaṃ panettha anuvicāraṇā – yadi ca tamkālikānampi brāhmaṇānam laddhi tatheva bhavēyya yathā etissam gāthāyaṃ vuttā, sā catthavaṇṇanā ācariyassa matimattā. Evaṃ sati sā vicāraṇā yuttā bhavēyya. Etissam pana gāthāyaṃ ‘‘brāhmaṇosya mukhamāsīdi’’ti paṭhamapādena ‘‘brāhmaṇā brahmuno mukhato jātā’’ti attho ujukato na labbhati. Buddhakāle pana brāhmaṇānam laddhi ‘‘brāhmaṇā brahmuno mukhato jātā’’ti evameva ahoṣīti pākaṭoyevāyattho. Tathā hi **dīghanikāye** pāthikavagge **aggaññasutte** (3, 67)

‘‘Dissanti kho pana vāseṭṭha brāhmaṇānam brāhmaṇiyo utuniyopi gabbhiniyopi vijāyamānāpi pāyamānāpi. Te ca brāhmaṇā 0 yonijāva samānā evamāhaṃsu – brāhmaṇova seṭṭho vaṇṇo, hīnā aññe vaṇṇā. Brāhmaṇova sukko vaṇṇo, kaṇhā aññe vaṇṇā. Brāhmaṇāva sujjhanti, no abrahmaṇā. Brāhmaṇāva brahmuno puttā orasā mukhato jātā brahmajā brahmanimmitā brahmadāyādāti. Te brahmanañceva abbhācikkhanti, musā ca bhāsanti, bahuñca apuññaṃ pasavanti’’ti –

Bhagavatā mahākāruṇikena vāseṭṭhabhāradvājānam brāhmaṇamāṇavakānam bhāsitaṃ, tehi ca tam abhinanditaṃ. Te pana dvepi māṇavakā jātivasena parisuddhabrahmaṇā ceva honti tiṇṇampi vedānam pāraguno ca. Tasmā ‘‘brāhmaṇā brahmuno mukhato nikkhantā’’ti vacanassa tamkālikānam brāhmaṇānam laddhivasena vuttabhāvo pākaṭoyeva. Yathā cetam, evaṃ ‘‘khattiyā urato, vessā nābhito, suddā jānuto, samaṇā piṭṭhipādato’’ti vacanampi ‘‘tamkālikabrāhmaṇānam laddhiññūhi porāṇaṭṭhakathācariyehi vutta’’nti saddahitvā ācariyabuddhaghosena tam sabbam porāṇaṭṭhakathāto bhāsāparivattanamattena visesetvā pakāsitaṃ bhavēyya. Tasmā tāyapi vedagāthāya ācariyassa abrahmaṇabhāvasādhanam anupapannamevāti.

(Kha) punapi tena ācariyabuddhaghosattherassa abrahmaṇabhāvasādhanattham dutiyampi kāraṇam evamāhaṭam –

‘‘Brāhmaṇaganthesu gabbhaghātavācakaṃ **bhrūnahāti** padaṃ pāliyaṃ bhūnahu (bhūnahano) iti dissati. **Māgaṇḍiyasutte** bhariyāya methunasamvāsābhāvena uppajjanārahagabbhassa nāsakattaṃ sandhāya māgaṇḍiyo paribbājako bhagavantaṃ ‘bhūnahu (bhūnahano) samaṇo gotamo’ti [[ma. ni. 2.207 ādayo](#)] āha. Tam buddhaghoso na jānātīti pākaṭoyeva tadatthasamvaṇṇanāya. Tattha hi tena bhūnahunoti (bhūnahanaṃ) padaṃ ‘hatavaḍḍhino mariyādakārakassā’ti [[ma. ni. atṭha. 2.207](#)] vaṇṇita’nti.

Tampi ayuttameva. Na hi māgaṇḍiyena phoṭṭhabbārammaṇāparibhogamattameva sandhāya bhūnahubhāvo vutto, atha kho channampi lokāmisārammaṇānam aparibhogam sandhāya vutto. Tasmīhi sutte –

‘‘Cakkhum kho māgaṇḍiya rūpārāmaṃ rūparataṃ rūpasammuditaṃ, tam tathāgatassa dantaṃ guttaṃ rakkhitaṃ samvutaṃ, tassa ca samvarāya dhammaṃ deseti, idaṃ nu te etaṃ māgaṇḍiya sandhāya bhāsitaṃ ‘bhūnahu samaṇo gotamo’ti. Etadeva kho pana me bho gotama sandhāya bhāsitaṃ ‘bhūnahu samaṇo gotamo’ti. Tam kissa hetu, evañhi no sutte ocaratīti...pe... mano kho māgaṇḍiya dhammārāmo dhammarato dhammasammudito, so tathāgatassa danto gutto

rakkhito saṃvuto, tassa ca saṃvarāya dhammaṃ deseti, idaṃ nu te etaṃ māgaṇḍiya sandhāya bhāsitaṃ ‘bhūnahū samaṇo gotamo’ti. Etadeva kho pana me bho gotama sandhāya bhāsitaṃ ‘bhūnahū samaṇo gotamo’ti. Taṃ kissa hetu, evañhi no sutte ocaratī’ti [ma. ni. 2.207 ādayo].

Evam bhagavato ca anuyogo māgaṇḍiyassa ca paṭiññā āgatā.

Ettha hi methunappaṭisevanavasena phoṭṭhabbārammaṇaparibhogahetu eva gabbhapatiṭṭhānaṃ sambhavatīti tadaparibhogameva sandhāya ‘‘bhūnahū’’ti vattuṃ arahati, tadaññesaṃ pana pañcannaṃ rūpādiārammaṇānaṃ, tathāpi visesato dhammārammaṇassa suddhamanoviññāṇena paribhogahetu natthi kiñci gabbhapatiṭṭhānanti tesam aparibhogaṃ sandhāya bhūnahūti vattuṃ na arahatiyeva, māgaṇḍiyena pana sabbānīpi tāni sandhāya vuttabhāvo paṭiññāto, kāraṇaṅcassa dassitaṃ ‘‘evañhi no sutte ocaratī’’ti. Tasmā kiñcāpi dāni brāhmaṇaganthesu bhūnahū- (bhrūnahā) saddo gabbhaghātanatthe dissati, māgaṇḍiyasutte paneso attho na yujjatīti ācariyena ‘‘hatavaḍḍhi mariyādakāraṅko’’ti ayamevattho porāṇaṭṭhakathāya bhāsāparivattanavasena pakāsītoti veditabbo.

(Ga) punapi tena ‘‘idampana buddhaghosassa abrahmaṇabhāvasādhakaṃ pacchimakāraṇaṃ, so hi **visuddhimagge** sīlaniddese (1, 31) brāhmaṇānaṃ parihāsaṃ karonto ‘evam iminā piṇḍapātaṭṭisevanena purāṇaṅca jighacchāvedanaṃ paṭihaṅkhāmi, navaṅca vedanaṃ aparimitabhojanapaccayaṃ **āharahattaka alamsāṭaka tatravaṭṭaka kākamāsaka bhuttavamitakabrāhmaṇānaṃ** aññataro viya na uppādessāmīti paṭisevatī’ti āha. Idaṃ pana ekassa bhinnabrāhmaṇaladdhikassāpi vacanaṃ siyāti tadeva daḥhakāraṇaṃ katvā na sakkā ‘buddhaghoso abrahmaṇo’ti vattu’nti tatiyaṃ kāraṇaṃ vuttaṃ. Taṃ pana atisaṃvejanīyavacanameva. Na hetam ācariyena brāhmaṇānaṃ parihāsaṃ kātukāmena vuttaṃ, na ca taṃ parihāsavacanena saṃyojetabbaṭṭhānaṃ, aññadatthu yathābhūtamattaṃ dassetvā sabrahmacārīnaṃ ovādānusāsānidānavasena vattabbaṭṭhānaṃ, tathāyeva ca ācariyena vuttaṃ. Tathā hi ye loke paradattūpajīvino samaṇā vā brāhmaṇā vā aññe vāpi ca puggalā, te paccavekkhaṇaññārahitā asaṃvare ṭhitā kadāci atipaṇitaṃ rasaṃ pahūtaṃ laddhā aparimitampi bhujjeyyūṃ, visesato pana brāhmaṇā lokikavatthivasena ca, jātakādisāsānikavatthivasena ca tādisā ahesunti pākaṭā. Imasmiñhi loke vassasatasahashehi vā vassakoṭṭhi vā aparicchinnaddhāne ko sakkā vattuṃ ‘‘nedisā bhūtapubbā’’ti. Tasmā tādisēhi viya na aparimitabhojanehi bhavitabbanti ovādānusāsānidānavaseneva vuttaṃ. Tadevaṃ atthasaṃhitampi samānaṃ ayonisomanasikaroto anattameva jātaṃ, yathā sabhāriyassa māgaṇḍiyabrāhmaṇassa anāgāmimaggaphalattāyapi desitā gāthā [dha. pa. aṭṭha. 1.sāmāvatīvatthu] tesam dhītuyā anattāya saṃvattatīti saṃvegoyevettha brūhetabboti.

Patañjalivādicāraṇā

3. Atha tena ‘‘pātañjalīmatam parivattetī’’ti vacanampi evam vicāritaṃ.

(Ka) ‘‘buddhaghoso patañjalissa vā aññesaṃ vā uttaraindiyaratṭhikānaṃ vādam appakameva aññāsī. Patañjalivādesu hi **aṇimā laghimāti** idameva dvayaṃ dassesi [visuddhi. 1.144] tatuttari yogasuttaṃ ajānanto, patañjalivādassa ca tuletva dīpanā tassa ganthesu na dissati, patañjalinaṃ katapakaraṇaṅca patañjalīti nāmamattampi ca tatha dīpitaṃ natthi. **Visuddhimagge** pana paññābhūminiddese ‘pakativādīnaṃ pakati viyā’ti [visuddhi. 2.584] pakativāda (saṃkhyāvāda) nāmamattaṃ pakāsitaṃ, tattheva ca ‘paṭiññā hetūtīdāsi hi loke vacanāvayavo hetūti vuccatī’ti [visuddhi. 2.595] udāharitaṃ, tena ñāyati ‘buddhaghoso indiyatakkāyadīpake ñāyaganthasmiṃ kiñci mūlabhāgamattaṃ aparipuṇṇaṃ jānātī’ti’’.

Taṃ pana sabbampi kevalaṃ ācariyassa abbhācikkhaṇamattameva. Atigambhīrassa hi atigarukātabbassa supārisuddhassa piṭakattayassa atthasaṃvaṇṇanaṃ karontena supārisuddhoyeva

pālinayo ca aṭṭhakathānayo ca porāṇatheravādā cāti īdisāyeva atthā pakāsetabbā, yaṃ vā pana atthasaṃvaṇṇanāya upakāraṃ saddavinicchayaapaṭisaṃyuttaṃ lokiyaganthavacanāṃ, tadeva ca yathārahaṃ pakāsetabbāṃ, na pana anupakārānipi taṃtaṃganthatakkattunāmāni ca, tehi vuttavacanāni ca bahūni, na ca tesāṃ appakāsanena “na te aṭṭhakathācariyo jānātī”ti vattabbo. Yadi hi yaṃ yaṃ lokiyaganthāṃ attanā jānāti, taṃ sabbāṃ anupakārāmpi attano aṭṭhakathāyamānetvā pakāseyya, ativitthārā ca sā bhavēyya aparissuddhā ca asammānitā ca sāsānikaviññūhīti ācariyena patañjalivādādayo na vitthārena pakāsitāti nātābbāṃ, aññadatthu yehi yehi lokiyaganthehi kiñci kiñci ācariyena ānetvā pakāsitāṃ, te te ca ganthā, aññēpi ca tādisā ācariyena nātātveva jānitābbā viññūhi, yathā samuddassa ekadesāṃ disvā sabbopi samuddo edisoti nāyati. Ācariyo pana yatha yatha vedapaṭisaṃyuttavacanāni āgatāni, tatha tatha vedaganthehipi kiñci kiñci ānetvā pakāsesiyeva. Tathā hi ācariyena **sumaṅgalavilāsiniyaṃ** nāma dīghanikāyāṭṭhakathāyaṃ –

“**Tiṇṇaṃ vedānanti** iruvedayajurvedasāmavedāna”nti [dī. ni. aṭṭha. 1.256] ca,

“**Itihāsapañcamānanti** athabbaṇavedaṃ catutthaṃ katvā itiha āsa itiha āsāti īdisavacanapaṭisaṃyutto purāṇakathāsāṅkhāto itihāso pañcāmo etesanti itihāsapañcamā, tesāṃ itihāsapañcamānaṃ vedāna”nti [dī. ni. aṭṭha. 1.256] ca,

“Yiṭṭhaṃ vuccati mahāyāgo”ti [dī. ni. aṭṭha. 1.170-172] ca,

“**Aggihomanti** evarūpena dārunā evaṃ hute idaṃ nāma hotīti aggijuhanaṃ. Dabbihomādīnipi aggihomāneva, evarūpāya dabbiyā īdisēhi kaṇādīhi hute idaṃ nāma hotīti evaṃ pavattivasena pana viṣuṃ vuttānī”ti [dī. ni. aṭṭha. 1.21] ca,

“Sāsapādīni pana mukhena gahetvā aggimhi pakkhipanaṃ, vijjaṃ parijappitvā juhanaṃ vā mukhahoma”nti [dī. ni. aṭṭha. 1.21] ca –

Evamādinā vedapaṭisaṃyuttavacanāni vedaganthānurūpato vaṇṇitāni. Tāni ca porāṇaṭṭhakathāto bhāsāparivattanasena vuttānipi bhavēyyuṃ, vedaganthesu pana akovidena yāthāvato bhāsāparivattanaṃ kātumpi na sukārameva, tasmā ācariyassa vedaganthesu kovidabhāvopi pākāṭoyeva. Evaṃ vedaganthesu ca tadaññalokiyaganthesu ca sukovidasseva samānassa tesāṃ vitthārato appakāsaṃ yathāvuttakāraṇenevāti veditābbāṃ.

Api ca ācariyo attano ganthārambheyeva –

“Tato ca bhāsantārameva hitvā,
Vitthāramaggañca samāsāyitvā;
Vinicchayaṃ sabbamasesāyitvā...pe...
Yasmā ayaṃ hessati vaṇṇanāpī”ti [pārā. aṭṭha. 1.ganthārambhakathā] ca.

“Apanetvāna tatohaṃ, sīhaḷabhāsaṃ manoramaṃ bhāsaṃ;
Tantīnāyānucchavikaṃ, āropetvā vigatadosaṃ.

Samayaṃ avilomento, therānaṃ theravaṃsapadīpānaṃ;
Sunipuṇavinicchayānaṃ, mahāvihāre nivāsinaṃ;
Hitvā punappunāgata-matthaṃ atthaṃ pakāsayissāmi”ti [dī. ni. aṭṭha. 1.ganthārambhakathā] ca–

Evaṃ porāṇaṭṭhakathānaṃ bhāsāparivattanasāṃkhipanavaseneva viśesetvā abhinavaṭṭhakathāyo karissāmīti paṭiññaṃ katvā yathāpaṭiññātameva akāsi, na attano nīṇāpabhāvena viśesetvātipi veditābbāṃ. Tasmā aṭṭhakathāsu patañjalivādādīnaṃ vitthārato appakāsanamārabha “buddhaghoso

patañjalivādādīni paripuṇṇaṃ na jānātī’ ti vacanaṃ kevalaṃ ācariyassa abbhācikkhaṇamattamevāti.

Kabbasatthavicāraṇā

4. Punapi so evamāha “kiñcāpi buddhaghoso rāmāyaṇamahābhāratasaṅkhātānaṃ mahākabbasatthānaṃ sukusalo viya na dissatī, tathāpi tāni dassesī. Kathaṃ? **Akkhānanti** bhāratayujjanādikaṃ, taṃ yasmim̐ thāne kathīyati, tattha gantumpi na vaṭṭatīti [dī. ni. aṭṭha. 1.13] ca, tassa (samphapalāpassa) dve sambhārā bhāratayuddhasītāharaṇādiniratthakakathāpurekkhārātā tathārūpikathākathanañcāti [dī. ni. aṭṭha. 1.8] ca dassesī’ ti.

Taṃ pana purimavacanatopi ahetukataraṃ kevalaṃ anādarīkaraṇamattameva. Atigambhīratthassa hi atigarukaraṇīyassa piṭakattayassa atthasaṃvaṇṇanāyaṃ niratthakassa samphapalāpasamudāyabhūtassa kabbasatthassa vitthārato pakāsanena kiṃ siyā payojanaṃ, aññadatthu sāyevassa asammanīṭā, anādariyā ca viññūhīti.

Bāhusaccaguṇamakkhanaṃ

5. Punapi dhammānando ācariyassa bāhusaccaguṇaṃ makkhetukāmo evamāha – “tassa (buddhaghosassa) samayantarakovidasaṅkhātāṃ bāhusaccaṃ na tato uttaritaraṃ hoti, yaṃ ādhunikānaṃ ganthantarakovidānaṃ sīhaḷikabhikkhūnaṃ yaṃ vā ekādasame kharistavassasatake (1001-1100) uppannānaṃ dakkhiṇāndiyaraṭṭhikānaṃ **anuruddha-dhammapālādīnaṃ** bhikkhūna’ nti.

Taṃ pana sabbathāpi ayuttavacanameva. Yadi hi ādhunikā vā sīhaḷikabhikkhū, porāṇā vā ācariyaanuruddha-dhammapālatherādayo samayantarabāhusaccavasena ācariyabuddhaghosena samānā vā uttaritarā vā bhaveyyuṃ, te ācariyabuddhaghosattherassa aṭṭhakathāhi anāraddhacittā hutvā tato sundaratarā paripuṇṇatarā ca abhinavaṭṭhakathāyo kareyyuṃ, na pana te tathā karonti, na kevalaṃ na karontiyeva, atha kho tesaṃ ekopi na evaṃ vadati “ahaṃ buddhaghosena bāhusaccavasena samasamoti vā uttaritaro’ ti vā, aññadatthu te ācariyassa aṭṭhakathāyoyeva saṃvaṇṇenti ca upatthambhenti ca, ācariyaṭṭhāne ca thapenti. Tenetaṃ ñāyati sabbathāpi ayuttavacananti.

Mahāyānikanayavicāraṇā

6. Puna so tāvattakenāpi asantuttho ācariyaṃ avamaññanto evamāha – “mahāyānanikāyassa padhānācariyabhūtānaṃ **assa ghosa-nāgajjunānaṃ** nayaṃ vā, nāmamattampi vā tesaṃ na jānātī maññe buddhaghoso’ ti. Taṃ pana ativiya adhammikaṃ niratthakañca niggahavacanamattameva. Na hi nikāyantarikānaṃ vādanayānaṃ attano aṭṭhakathāyaṃ appakāsanena so te na jānātīti sakkā vattuṃ. Nanu ācariyena āgamaṭṭhakathāsu ganthārambheya –

“Samayaṃ avilomento, therānaṃ theravaṃsapadīpānaṃ;
Sunipuṇṇavinicchayānaṃ, mahāvihāre nivāsina’ nti ca,

Idhāpi visuddhimagge –

“Mahāvihāravāsīnaṃ, desanānayanissitaṃ;
Visuddhimaggaṃ bhāsissa’ nti [visuddhi. 1.2] ca,

“Tassā atthasaṃvaṇṇanaṃ karontena vibhajjavādimaṇḍalaṃ otaritvā ācariye anabbhācikkhantena sakasamayaṃ avokkamantena parasamayaṃ anāyūhantena suttaṃ

appaṭibāhantena vinayaṃ anulomentena mahāpadese oloketena dhammaṃ dīpentena atthaṃ saṅgāhentena tamevatthaṃ punarāvattetvā aparehipi pariyāyantarehi niddisantena ca yasmā atthasaṃvaṇṇanā kātabbā hotī”ti [visuddhi. 2.581] ca,

“Sāsanam panidaṃ nānā-desanāyamaṇḍitaṃ;
Pubbācariyamaggo ca, abbochinno pavattati;
Yasmā tasmā tadubhayaṃ, sannissāyatthavaṇṇanam;
Ārabhissāmi etassā”ti [visuddhi. 2.581] ca,

Paṭiññaṃ katvā yathāpaṭiññātappakārenea aṭṭhakathāyo katā. Evametāsaṃ karaṇe kāraṇampettha pakāsetabbaṃ, tasmā dāni tampakāsanatthaṃ sammāsambuddhassa parinibbutikālato paṭṭhāya yāva ācariyabuddhaghosassa kālo, tāva sāsanappavattikkamampi vakkhāma.

Sāsanappavattikkamo

Bhagavato hi parinibbutikālato pacchā vassasatabbhantare buddhasāsane kocipi vādabhedo nāma natthi. Vassasatakāle pana dutiyasaṅgītikārehi therehi nikkadḍhitā vajjiputtakā bhikkhū pakkhaṃ labhitvā dhammañca vinayañca aññathā katvā mahāsaṅgītināmena visuṃ saṅgītimakaṃsu. Tadā saṅgītidvayārūḥapurāṇadhammavinayameva sampaṭicchantaṇaṃ therānaṃ gaṇo **theravādoti** ca tadaññesaṃ **mahāsaṅghikoti** ca voharīyanti.

Puna mahāsaṅghikato (1) **gokuliko** (2) **ekabyohārikoti** dve ācariyagaṇā uppannā. Puna gokulikato (3) **paññattivādo** (4) **bāhuliko (bahussutiko)**ti dve uppannā. Puna bāhulikato (5) **ctiyavādigaṇo** uppannoti ete pañca mūlabhūtena mahāsaṅghikena saha cha pāṭiyekkā ācariyagaṇā ahesuṃ.

Visuddhattheravādatopi (1) **mahisāsako** (2) **vajjiputtakoti** dve ācariyagaṇā uppannā. Puna mahisāsakato (3) **sabbatthivādo** (4) **dhammaguttikoti** dve uppannā. Puna sabbatthivādatopi (5) **kassapiyo**, tatopi (6) **saṅkantiko**, tatopi (7) **suttavādīti** tayo uppannā. Vajjiputtakatopi (8) **dhammottariyo** (9) **bhaddayāniko** (10) **channāgāriko** (11) **sammitiyoti** cattāro uppannāti te ekādasā mūlabhūtena visuddhattheravādena saha dvādasā ācariyagaṇā ahesuṃ. Iti ime ca dvādasā purimā ca chāti aṭṭhārassa ācariyagaṇā dutiyatatiyasaṅgītaṃ antare jātā ahesuṃ.

Tesu mūlabhūto **theravādagaṇo**eva porāṇadhammavinayagaruko hutvā anūnāmanadhikaṃ kevalaparipuṇṇaṃ parisuddhaṃ porāṇikaṃ dhammavinayaṃ dhāresi. Itare pana sattarasa bhinnagaṇā porāṇikaṃ dhammavinayaṃ aññathā akaṃsu. Tena tesam dhammavinayo katthaci ūno katthaci adhiko hutvā aparipuṇṇo ceva ahosi aparisuddho ca. Tena vuttaṃ dīpavaṃse pañcamaparichede –

30. “Nikkadḍhitā pāpabhikkhū, therehi vajjiputtakā;
Aññaṃ pakkhaṃ labhitvāna, adhammavādī bahū janā.
31. Dasasahassā samāgantvā, akaṃsu dhammasaṅgahaṃ;
Tasmāyaṃ dhammasaṅgīti, mahāsaṅgīti vuccati.
32. Mahāsaṅgītikā bhikkhū, vilomaṃ akaṃsu sāsane;
Bhinditvā mūlasaṅgahaṃ, aññaṃ akaṃsu saṅgahaṃ.
33. Aññaṭṭra saṅgahitaṃ suttaṃ, aññaṭṭra akariṃsu te;
Atthaṃ dhammañca bhindiṃsu, vinaye nikāyesu ca pañcasu...pe...
49. Atthaṃ dhammañca bhindiṃsu, ekadesaṅga saṅgahaṃ;

Ganthañca ekadesañhi, chaḍḍetvā aññaṃ akaṃsu te.

50. Nāmaṃ līgaṃ parikkhāraṃ, ākappakaraṇīyāni ca;
Pakatibhāvaṃ jahitvā, tañca aññaṃ akaṃsu te.
51. Sattarasa bhinnavādā, ekavādo abhinnako;
Sabbevaṭṭhārasa honti, bhinnavādena te saha.
52. Nigrodhova mahārukkho, thera vādānamuttamo;
Anūnaṃ anadhikañca, kevalaṃ jinasāsaṃ;
Kaṇṭakā viya rukkhamaṃhi, nibbattā vādasesakā.
53. Paṭhame vassasate natthi, dutiye vassasatantare;
Bhinnā sattarasa vādā, uppannā jinasāsane’’ti [[kathā. aṭṭha. nidānakathā](#)].

Asokarañño ca kāle parihīnalābhasakkārā aññatitthiyā lābhasakkāraṃ patthayamānā bhikkhūsu pabbajitvā sakāni sakāni diṭṭhigatāni dīpentī “ayaṃ dhammo, ayaṃ vinayo, idaṃ satthusāsana’’ntī. Bhikkhūnaṃ santike pabbajjaṃ alabhamānāpi sayameva kese chinditvā kāsāyāni vatthāni acchādetvā vihāresu vicarantā uposathakammādikaraṇakāle saṅghamaṃjhaṃ pavisanti, te bhikkhusaṅghena dhammena vinayena satthusāsanaena niggayhamānāpi dhammavinayānulomāya paṭipattiyā asaṅghahantā anekarūpaṃ sāsanaṃ abbudañca malañca kaṇṭakañca samuṭṭhāpentī. Keci aggīṃ paricaranti, keci pañcātape tapanti, keci ādiccaṃ anuparivattanti, keci dhammañca vinayañca vobhindissāmāti tathā tathā paggaṇhanti. Tadā bhikkhusaṅgho na tehi saddhiṃ uposathaṃ vā pavāraṇaṃ vā akāsi, asokārāme satta vassāni uposatho upacchijji [[kathā. aṭṭha. nidānakathā](#); [pārā. aṭṭha. 1.tatīyasāṅgītikathā](#)].

Imaṃ pana pavattīṃ upādāya evampi sakkā gahetuṃ “sattarasannaṃ bhinnavādagaṇānaṃ dhammavinayassa pacchimakālesu aparisuddhatarabhāvo īdisenapi kāraṇena ahoṣ’’ti. Kiñcāpi hi buddhasāsanaabhūte parisuddhadhammavinaye “kocipi nicco dhuvo sassato nāma natthi aññatra nibbānadhātuyā, paramatthato attāpi natthi, sabbepi saṅkhārā aniccā addhuvā asassatā anattāyevā’’ti attho ativiya pākaṭo hoti, tathāpi dāni atheravādīkānaṃ ganthesu ca pubbe vetullavādādīsu ca “buddho nicco dhuvo sassato attā’’ti ca, “sabbepi sattā niccā dhuvā sassatā attā’’ti ca attho dissati.

Atha asoko dhammarājā sāsanaṃ visodhetukāmo **moggaliputtatissattherassa** santike paṭhamameva samayaṃ uggaṇhitvā ekaladdhike ekaladdhike bhikkhū ekato kāretvā ekamekaṃ bhikkhusamūhaṃ pakkosāpetvā pucchi “kiṃ vādī bhante sammāsambuddho’’ti. Tato ye ye “sammāsambuddho sassatavādī’’ti vā, “ekaccasassatavādī’’ti vā evamādinā attano attano vādānurūpaṃ micchāvādaṃ āhaṃsu, te te “nayime bhikkhū, aññatitthiyā ime’’ti tathato ñatvā tesam setakāni vatthāni datvā uppabbājesi. Te sabbepi saṭṭhisahassamattā ahesuṃ.

Athaññe bhikkhū pucchitvā tehi “vibhajjavādī mahārāja sammāsambuddho’’ti vutte “suddhaṃ dāni bhante sāsanaṃ, karotu bhikkhusaṅgho uposatha’’ntī vatvā ārakkhañca datvā nagaraṃ pāvisi. Samaggo saṅgho sannipatitvā uposathaṃ akāsi. Tasmīṃ samāgame **moggaliputtatissatthero** yāni ca tadā uppannāni vatthūni yāni ca āyatīṃ uppajjissanti, sabbesampi tesam paṭibāhanatthaṃ sathārā dinnanayavaseneva tathāgatena ṭhapitamātikaṃ vibhajanto parappavādamaddanaṃ **kathāvattuṃ** nāma abhidhammapītake pañcamaṃ pakaraṇaṃ abhāsi. Tato moggaliputtatissattherappamukhā tipītakapariyattidharā pabhinnapaṭisambhidāpattā sahasaṃ bhikkhū theravādino saṅgītidvayārūlhaṃ parisuddhaṃ porāṇadhammavinayaṃ puna saṅgāyitvā surakkhitaṃ rakkhiṃsu [[pārā. aṭṭha. 1.tatīyasāṅgītikathā](#)].

Atha moggaliputtatissatthero navasu paccantaṭṭhānesu sāsanaṃ paṭiṭṭhāpanatthaṃ nava nāyakatthere uccinitvā pesesi. Tesu aṭṭhahi therehi attano attano pattaṭṭhānaṃ gantvā buddhasāsane paṭiṭṭhāpīte

mahāmahindatthero chattimsādhikadvisate (236) buddhavassee jambudīpato sīhaḷadīpaṃ gantvā **devānaṃpiyatissarājappamukhaṃ** dīpakajanasamūhaṃ pasādetvā buddhasāsanāṃ sampatiṭṭhāpesi, tena ca raññā dinnāṃ **mahāmeghavanuyyānaṃ** paṭiggahetvā tatha **mahāvihāraṃ** nāma saṅghārāmaṃ patiṭṭhāpesi [pārā. aṭṭha. 1.tatīyasaṅgītikathā]. Tato pabhuti sīhaḷadīpe buddhasāsanāṃ yāva **vaṭṭagāmaṇirājakālā** nikāyantaravādākularahitaṃ nimmalaṃ suparisuddhaṃ hutvā samujjalittha. Vaṭṭagāmaṇirājakālato pana paṭṭhāya nikāyantaravādāpi sīhaḷadīpamupāgamiṃsu. Tadā **visuddhattheravādino** yathā purāṇadhammavinayo tehi nikāyantaravādehi asammisso amalīno pakatiparisuddho hutvā tiṭṭheyya, tathā taṃ mahussāhena surakkhitaṃ rakkhiṃsu. Kathaṃ?

Abhayagirinikāyuppatti

Vaṭṭagāmaṇirājā hi (425-buddhavassee) rajjaṃ patvā pañcamāsamattakāle **brāhmaṇatissadāmarikena** sattaḥi ca dāmiḷayodhehi upadduto saṅgāme ca parājito palāyitvā sādhikāni cuddasavassāni nilīyitvā aññataravesena vasati [mahāvamse 33-paricchede 37-gāthāto paṭṭhāya]. Tadā laṅkādīpe manussā corabhayena dubbhikkhabhayena ca upaddutā bhikkhūnaṃ catūhi paccayehi upaṭṭhātuṃ na sakkonti, tena bhikkhū yebhuyyena tato jambudīpaṃ gantvā dhammavinayaṃ dhārentā viharanti. Laṅkādīpeyeva ohīnāpi therā yathāladdehi kandamūlapaṇṇehi yāpentā kāye vahante nisīditvā pariyattidhammaṃ sajjhāyaṃ karonti, avahante vālukaṃ ussāpetvā taṃ parivāretvā sīsāni ekatṭhāne katvā pariyattim sammasanti. Evaṃ dvādasa saṃvaccharāni sātṭhakathaṃ tepiṭakaṃ ahāpetvā dhārayiṃsu. Yadā pana vaṭṭagāmaṇirājā dāmiḷarājānaṃ hantvā (455-466 buddhavassabbhantare) punapi rajjaṃ kāresi [mahāvamse 33, 78-gāthā]. Tadā te therā jambudīpato paccāgatattherehi saddhim tepiṭakaṃ sodhentā ekakkharampi asantaṃ nāma na passiṃsu [a. ni. aṭṭha. 1.1.130; vibha. aṭṭha. 810]. Yopi ca **mahānidde**so tasmim kāle ekasseva dussīlabhikkhuno paguṇo ahoṣi, sopi **mahātipiṭakattherena mahārakkhitattheraṃ** tassa santikā uggaṇhāpetvā rakkhito ahoṣi [pārā. aṭṭha. 2.585]. Evaṃ dubbhikkharatṭhakkhobhupaddavehi pīḷitattā duddharasamayepi dhammavinayaṃ sakkaccaṃ dhārayiṃsu.

Rājā **abhayagirim** nāma vihāraṃ kāretvā attano katūpakārapubbassa **mahātissattherassa** adāsi. So pana thero kulasaṃsaggabahulattā mahāvihāravāsīhi bhikkhūhi pabbājanīyakammaṃ katvā nīhaṭo. Tadāssa sisso **bahalamassutissanā**mako thero taṃ kammaṃ paṭibāhi, tenassa saṅgho ukkhepanīyakammaṃ akāsi. So mahāvihāravāsīnaṃ kujjhivā abhayagirivihārameva gantvā tena mahātissattherena ekato hutvā viṣuṃ gaṇaṃ vahanto vasi. Te ca dve therā na mahāvihāraṃ punāgamiṃsu [mahāvamse 33, 79-gāthādīsu. nikāyasaṅgahe]. Tato paṭṭhāya sīhaḷadīpe mahāvihāravāsī, abhayagirivāsīti dve nikāyājātā. Idaṃ tāva sīhaḷadīpe sāsanaparihāniyā paṭhamaṃ kāraṇaṃ.

Dhammarucinikāyuppatti

Tadā ca rājā abhayagirivāsīsuyeva bhikkhūsu viṣesato pasanno hutvā teyeva catūhi paccayehi pavāretvā paggaṇhāti, rājamahāmattādayopi abhiññātā abhiññātā bahū janā tasmīṅca ārame aññattha ca bahū āvāse katvā tesam denti. Evaṃ abhayagirivāsīno bhikkhū bahūnaṃ abhiññātajanānaṃ sakkatā ceva honti pūjītā ca mānītā ca. Puna ca abhayagirivāsīno bahalamassutissattherādayoindīyaraṭṭhato āgataṃ vajjiputtakagaṇapariyāpannassa dhammarucinikāyassa dhammavinayabhūtaṃ sakkatabhāsāropitaṃ abhinavampi piṭakaṃ sampaṭicchanti [mahāvamse 33, 99 gāthāsu. nikāyasaṅgahe], tena tepi dhammarucinikāyikā nāma ahesuṃ. Idaṃ sīhaḷadīpe sāsanaparihāniyā dutiyaṃ kāraṇaṃ.

Piṭakattayassa potthakāropanaṃ

Mahāvihāravāsīno pana porāṇikaṃ pāḷibhāsāya saṅghitaṃ parisuddhapiṭakameva paṭiggaṇhanti, taṅca mukhapāṭheneva dhārenti. Tadā pana therā pacchimajanānaṃ satipaṇṇāhāniṃ disvā buddhakālato

paṭṭhāya yāva taṃkāḷā mukhapāthenābhatam sātṭhakatham piṭakattayam potthake āropetum samārabhiṃsu. Samārabhamānā ca te **anurādharājadhānī**purato aṭṭhasaṭṭhimilappamaṇe **malayajanapade māṭula** [māṭale iti etarahi vohāro] nagare ālokaleṇe vasantā ekassa tandesikassa janapadādhipatino ārakkham gahetvā taṃ **potthakāropanakammamakaṃsu** [mahāvamse 33, 100-101-gāthāsu]. Tenidaṃ nāyati “tadā mahāvihāravāsino therā rājarājamahāmattehi aladdhūpakārā hutvā attano baleneva piṭakattayassa potthakāropanakammamakaṃsū”ti ca, “tañca yatheva pacchimajanānaṃ satipaññāhāniṃ disvā katam, tatheva dubbhikkharatṭhakkhobhādibhayupaddutakālesu duddharabhāvampi disvā”ti ca, tathā “abhayagirivāsīnaṃ sampaṭicchitasamayantaravādehi anākulanatthampi kata”nti ca. Evaṃ mahāvihāravāsino therā parisuddhattheravādapīṭakam samayantarehi asammissanattāyā yathā pure, tathā pāḷibhāsāya eva potthake āropetvāpi surakkhitam rakkhiṃsu. Yadi hi tadā tepiṭakam potthakesu anāropitamassa, pacchākālesu samayantarato āgatasuttāni “netāni amhāka”nti paṭikkhipitum na sukarāni bhaveyyum. Yato ca kho tadā sātṭhakatham tepiṭakam potthakesu āropitam, tato yeva anāgatakālesu samayantarāgatasuttāni tehi potthakehi saṃsandetvā paṭikkhipitum sukarāni honti.

Tathā hi **bhāṭiyarājakāle** (524-552-bu-va) mahāvihāravāsīnaṃ abhayagirivāsīhi vinaye vivādo uppajji. Tadā rājā **dīghakārāyanam** nāma brāhmaṇajātikam amaccam therānaṃ santikam pesesi. So ubhinnaṃ suttaṃ sutvā vinicchayaṃ adāsi [pārā. aṭṭha. 2.384]. Tathā **vohārakatissarājakāle** ca (758-780 bu-va) **goṭṭhābhayarājakāle** ca (797-810 bu-va) theravādikā potthakārūḷhena dhammavinayena saṃsandetvā adhammavādam paṭikkhipiṃsu [nikāyasaṅgahe 12-piṭṭhe].

Adhammavāduppatti

Ayam pana ādito paṭṭhāya sāsanaṃmalabhūtānaṃ adhammavādānaṃ uppatti. **Asokarañño** hi kāle uppabbājetvā nikkadḍhitā **aññatitthiyā** buddhasāsane aladdhapatitṭhā kodhābhībūtā **pāṭaliputtato** nikkhamitvā **rājagahasamīpe nālandāyam** sannipatitvā evaṃ sammantayimṃsu “mahājanassa buddhasāsane anavagāhatthāya sakyānaṃ dhammavinayo nāsetabbo, tañca kho tesam samayaṃ ajānantehi na sakkā kātum, tasmā yena kenaci upāyena punapi tattha pabbajitabbamevā”ti. Te evaṃ sammantayitvā puna āgantvā visuddhattheravādīnamantaram pavisitum asakkontā tadaññesaṃ sattarasannaṃ mahāsaṅghikādinikāyānaṃ santikam upasaṅkamitvā attano aññatitthiyabhāvaṃ ajānapetvā pabbajitvā piṭakattayamuggaṇhitvā tañca viparivattetvā tato **kosambim** gantvā dhammavinayanāsanāya upāyam mantayitvā 253-buddhavasase chasu ṭhānesu vasantā (1) **hemavatiko** (2) **rājagiriko** (3) **siddhatthiko** (4) **pubbaseliyo** (5) **aparaseliyo** (6) **vājiriyo** (7) **vetullo** (8) **andhako** (9) **aññamahāsaṅghikoti** nava abhinave nikāye uppādesum [nikāyasaṅgahe 9-piṭṭhe]. Tesam nāmāni ca laddhiyo ca **kathāvattuhatṭhakathāyam** āgatāyeva.

Tesu hemavatikā saddhammapatirūpakam buddhabhāsītabhāvena dassetvā

(1) **Vaṇṇapiṭakam** nāma gantham akaṃsu.

Rājagirikā (2) **aṅgulimālapīṭakam**,

Siddhatthikā (3) **gūḷhavessantaram**,

Pubbaseliyā (4) **raṭṭhapālagajjitam**,

Aparaseliyā (5) **āḷavakagajjitam**,

Vajirapabbatavāsino vājiriya (6) **gūḷhavinayam** nāma gantham akaṃsu.

Teyeva sabbe mājājalatanta-samājatantādike aneke **tantaganthe** ca, marīcikappa-herambhakappādike aneke **kappaganthe** ca akaṃsu.

Vetullavādino pana (7) **vetullapiṭakamakam**su.

Andhakā ca (8) **ratanakūṭā**dike ganthe,

Aññamahāsaṅghikā ca (9) **akkharasāriyā**disuttante akaṃsu [[nikāyasaṅgahe 9-piṭṭhe](#)].

Tesu pana saddhammapatirūpakesu vetullavādo, vājiriyavādo, ratanakūṭasatthanti imāniyeva tīṇi laṅkāḍīpamupāgatāni, aññāni pana vaṇṇapiṭakādīni jambudīpeyeva nivattantīti **nikāyasaṅgahe** vuttaṃ. Vaṇṇapiṭakādīnampi pana laṅkāḍīpamupāgatacchāyā dissateva. Tathā hi **samantapāsādikāya** vinayaṭṭhakathāyaṃ (3, 9-piṭṭhe)

“Vaṇṇapiṭaka aṅgulimālapītakaraṭṭhapālagajjitaāḷavakagajjitaḡūlhamaggagūlhavessantara ḡūlḡhavinaya vedallapiṭakāni [[ettha “vepulla, vedallaṃ, vetullanti atthako ekaṃ, bodhisattapiṭakasessa nāma”nti veditabbaṃ. tathā hi vuttaṃ asaṅgena nāma ācariyena abhidhammasamuccaye nāma mahāyānikagante \(79-piṭṭhe\) “vepullaṃ katamaṃ? bodhisattapiṭakasampayuttaṃ bhāsitaṃ. yaduccate vepullaṃ, taṃ vedallamapyuccate, vetullamapyuccate. kimatthaṃ vepullamuccate? sabbasattānaṃ hitasukhādhiṭṭhānato, udāragambhīradhammadesanāto ca. kimatthamuccate vedallaṃ? sabbāvaraṇavidalanato. kimatthamuccate vetullaṃ? upamānadhammānaṃ tulanābhāvato”ti\]](#) pana abuddhavacanāniyevāti vutta”nti ca.

Sāratthappakāsiniyā saṃyuttaṭṭhakathāyampi (2, 186-piṭṭhe)

“ḡūlḡhavinayaṃ ḡūlḡhavessantaraṃ ḡūlḡhamahosadhaṃ vaṇṇapiṭakaṃ aṅgulimālapītakaṃ raṭṭhapālagajjitaṃ āḷavakagajjitaṃ vedallapiṭakanti abuddhavacanaṃ saddhammapatirūpakaṃ nāmā”ti ca—

Tesaṃ paṭikkhepo dissati. Na hi tāni asutvā, tesaṅca atthaṃ ajānitvā sīhaḷaṭṭhakathācariyehi tāni paṭikkhipituṃ sakkā, nāpi taṃ paṭikkhepavacanaṃ jambudīpikaṭṭhakathācariyānaṃ vacanaṃ bhavituṃ, mahāmahindattherassa sīhaḷadīpaṃ gamanasamaye tesaṃyeva abhāvato. Tasmā tāni ca tadaññāni ca mahāyānikapiṭakāni taṃkālikāni yebhuyyena sīhaḷadīpamupāgatānīti gahetabbāni. Tesu ca **vajjiputtakagaṇa**pariyāpanassa **dhammarucīnikāyassa** piṭakānaṃ tadupāgamaṃ pubbeva vuttaṃ. Tadaññesaṃ pana tadupāgamaṃ evaṃ veditabbaṃ.

Vetullavādassa paṭhamaniggaho

Vohārakatissarañño kāle (758-780-bu-va) abhayagirivāsino dhammarucīnikāyikā pubbe vuttappakārena sāsanavināsanatthāya bhikkhavesadhārīhi vetullavādībrāhmaṇehi racitaṃ vetullapiṭakaṃ sampaṭiggahetvā “idaṃ buddhabhāsita”nti dassenti. Taṃ mahāvihāravāsino theravādikā dhammavinayena saṃsandetvā adhammavādoti paṭikkhipiṃsu. Taṃ sutvā rājā sabbasatthapāraguṃ **kapilaṃ** nāma amaccaṃ pesetvā vinicchayaṃ kārapetvā abuddhabhāsitaḡūlḡhavaṃ ḡatvā sabbam vetullapotthakaṃ jhāpetvā talladdhike ca pāpabhikkhū niggahetvā buddhasāsanam jotesi [[nikāyasaṅgahe 12-piṭṭhe](#)]. Vuttañhetam mahāvamse —

36-41: Vetullavādaṃ madditvā, kāretvā pāpaniggahaṃ;
Kapilena amaccena, sāsanam jotayī ca so”ti.

Sāgaliyanikāyuppatti

Punapi te abhayagirivāsino **goṭhābhayarañño** kāle (797-810-bu-va) vetullavādaṃ tatheva dassenti. Tada pana tesu **ussiliyātisso** nāma mahāthero **voḥārakatissarājakāle** vetullavādīnaṃ bhikkhūnaṃ kataniggahaṃ sutvā “vicāraṇasampannassa rañño samaye tatheva bhavēyya, na bhaddakameta” nti cintetvā “na mayaṃ tehi ekato homā” ti tisatamatte bhikkhū gahetvā dakkhiṇagirivihāraṃ gantvā **dhammarucinikāyato** viṣuṃ hutvā vasi. Tesu **sāgalo** nāma mahāthero tattheva dakkhiṇagirimhi vasanto āgamabyākhyānamakāsi. Tato paṭṭhāya taṃ theramārabba tassantevāsino **sāgaliyā** nāma ahesuṃ. Tesampi vādo pacchā **mahāsenarājakāle jetavanavihāre** patthari [nikāya 13-piṭṭhe].

Vetullavādassa dutiyaniggaho

Goṭhābhayo pana rājā pañcasu [mahāvihāra, cetiya, thūpārāma, issarasamaṇaka, vessagirivihārasaṅkhātesu] vihāresu mahābhikkhusaṅghaṃ ekato sannipādetvā taṃ pavattiṃ pucchitvā vetullavādassa abuddhabhāsita bhāvaṃ ñatvā taṃvādino saṭṭhi pāpabhikkhū lakkhaṇāhate katvā raṭṭhato pabbājesi, vetullapotthakāni ca jhāpetvā buddhasāsaṇaṃ jotesi [mahāvamse 36, 111-112-gāthāsu, nikāya 13-piṭṭhe].

Tadā raṭṭhato pabbājitesu tesu bhikkhūsu keci **kāvīrapaṭṭanaṃ** gantvā tattha vasanti. Tasmīṇca samaye eko aññatitthiyamānavako desantarato kāvīramāgantvā paṭṭanaḡāmikehi tesu bhikkhūnaṃ katūpahāraṃ disvā lābhasakkāraṃ nissāya tesu santike pabbajitvā **saṅghamittoti** nāmena pākaṭo ahoṣi. So mahāvihāravāsīnaṃ dhammavinicchayaṃ nissāya goṭhābhayaraññā vetullavādahetu tesu bhikkhūnaṃ raṭṭhā pabbājita bhāvaṃ ñatvā mahāvihāravāsīnaṃ kuddho hutvā “vetullavādaṃ vā ne gāhāpessāmi, vihāre vā nesuṃ ummūletvā vināsessāmi” ti sihaḡadīpaṃ gantvā rājānaṃ pasādetvā tassa dve putte sippaṃ sikkhāpessāmi ārabhi. Tathāpi attano vādassa jānanaṣamatthaṃ **jeṭṭhatissaṃ** ohāya anāgate attano vacanaṃ kārapetuṃ sakkuṇeyyaṃ kaniṭṭhaṃ **mahāsenakumāra**meva saṅgaṇhitvā sippaṃ sikkhāpesi. Vituno accayena jeṭṭhatissakumāre rajjaṃ patte (810-819-bu-va) so tassa rañño bhīto kāvīrapaṭṭanaṃ gato [mahāvamse 36, 113-gāthādīsū, nikāya 14-piṭṭhe].

Mahāsenarañño pana kāle (819-845-bu-va) so puna sihaḡadīpamāgantvā **abhayagirivihāre** vasanto mahāvihāravāsīhi vetullavādaṃ gāhāpetuṃ nānāpakārehi vāyāmakāsi. Tathāpi tehi taṃ gāhāpetuṃ asakkonto rājānaṃ upasaṅkamitvā nānākāraṇehi saññāpetvā “yo koci ekassapi bhikkhussa mahāvihāravāsīno āhāraṃ dadeyya, tassa sataṃ daṇḡo” ti rañño āṇāya nagare bheriṃ carāpesi. Tada mahāvihāravāsīno nagare piṇḡāya carantā tayo divase bhikkhamaladdhā mahāpāsāde sannipatitvā “sace mayaṃ khudāhetu adhammaṃ dhammoti gaṇheyyāma, bahū janā taṃ gahetvā apāyagāmino bhavissanti, mayaṇca sabbe sāvajjā bhavissāma, tasmā na mayaṃ jīvita hetupi vetullavādaṃ paṭiggaṇhissāmā” ti sammantayitvā mahāvihārādike sabbavihāre chaḡḡetvā **rohaṇajanapada**ṇca **malayapadesa**ṇca agamiṃsu [mahāvamse 37, 2-6-gāthāsu, nikāyasāṅgaha 14-piṭṭhe].

Vetullavādo

Kīdiso **vetullavādo** nāma, yato mahāvihāravāsīno ativiya jigucchiṃsūti? Idāni vetullavādassa sarūpaṃ sabbākārena pakāsetuṃ na sakkā, vetullanāmena potthakānaṃ vā nikāyassa vā etarāhi apākaṭa bhāvato. Abhidhammapiṭake pana kathāvattatthakathāyaṃ [kathā, aṭṭha, 793-794 ādayo] katipayā vetullavādā āgatā. Kathaṃ? –

“Paramatthato maggaḡhalāneva saṅgho, maggaḡhalehi añño saṅgho nāma natthi, maggaḡhalāni ca na kiṇci paṭiggaṇhanti, tasmā na vattabbaṃ saṅgho dakkhiṇaṃ paṭiggaṇhāti” ti ca (1).

“Maggaphalāneva saṅgho nāma, na ca tāni dakkhiṇaṃ visodhetuṃ sakkonti, tasmā na vattabbaṃ saṅgho dakkhiṇaṃ visodhetī”ti ca (2).

“Maggaphalāneva saṅgho nāma, na ca tāni kiñci bhuñjanti, tasmā na vattabbaṃ saṅgho bhuñjati pivati khādati sāyatī”ti ca (3).

Maggaphalāneva saṅgho nāma, na ca sakkā tesam kiñci dātuṃ, na ca tehi paṭiggaṇhituṃ, nāpi tesam dānena koci upakāro ijhanti, tasmā na vattabbaṃ saṅghassa dinnam mahapphala”nti ca (4).

“Buddho bhagavā na kiñci paribhuñjati, lokānuvattanatthaṃ pana paribhuñjamānaṃ viya attānaṃ dasseti, tasmā nirupakārattā na vattabbaṃ tasmim dinnam mahapphala”nti ca (5).

“Bhagavā tusitabhavane nibbatto tattheva vasati, na manussalokaṃ āgacchati, nimmitarūpamattakaṃ panettha dasseti”ti ca (6).

“Tusitapure ṭhito bhagavā dhammadesanattāya abhinimmitaṃ pesesi, tena ceva, tassa ca desanaṃ sampaṭicchitvā āyasmatā ānandena dhammo desito, na buddhena bhagavatā”ti ca (7).

“Ekādhippāyena methuno dhammo paṭisevitabbo. Ayaṃ panettha attho – kāruṇīyena vā ekena adhippāyena ekādhippāyo, saṃsāre vā ekato bhavissāmāti itthiyā saddhiṃ buddhapūjādīni katvā paṇidhivasena eko adhippāyo assāti ekādhippāyo, evarūpo dvinnampi janānaṃ ekādhippāyo methuno dhammo paṭisevitabbo”ti ca (8) evaṃ vetullavādīnaṃ laddhiyo āgatā, ettakāyeva nesam vādā theravādaganthavasena dāni paññāyanti.

Ettha ca ādito catūhi vādehi suttantāgatasāṅgho ca micchā gahito, vinayāgatasāṅgho ca sabbathā paṭikkhitto. Tadanantaraṃ tayo vādā issaranimmānavādānuvattakā. Antimassa pana asaddhammavādabhāvo ativiya pākaṭoti.

Abhidhammasamuccaye pana vetullapiṭakassa bodhisattapiṭakabhāvo pakāsito, tasmā saddhammapuṇḍarikasuttādike bodhisattapiṭake āgatavādopi “vetullavādo”ti veditabbo [[abhidhammasamuccaye 79-piṭṭhe](#)].

Mahāvihāranāsanam

Mahāvihāravāsīsu pana vuttapakārena sabbavihāre chaḍḍetvā gatesu saṅghamitto pāpabhikkhu rājānaṃ saññāpetvā lohapāsādādike catusaṭṭhyādhike tīsatamatte parivenāpāsāde nāsetvā samūlaṃ uddharāpetvā abhayagirivihāraṃ ānayāpesi. Vihārabhūmiyañca kasāpetvā aparāṇṇe vapāpesi. Evaṃ tadā mahāvihāro nava vassāni bhikkhūhi suñño ahosi āvāsavirahito ca. Atha rājā **meghavaṇṇābhayassa** nāma kalyāṇamittabhūtassa amaccassa santajjanapubbaṅgamaṇa vacanena mahāvihāraṃ puna pākatiṃ katvā te cāpi apakkante bhikkhū ānetvā catūhi paccayehi upaṭṭhahi [[mahāvamse 37-30-gāthāsu. nikāyasaṅgahe 14-15-piṭṭhesu](#)].

Jetavanavāsīnikāyuppatti

Punapi rājā **dakkhiṇārāma**vāsīsimhi jimhamānase **kuhakatissatthere** pasanno hutvā tassatthāya mahāvihārasīmabbhantare **jetivanuyyāne** jetavanavihāraṃ kāretumārābhi. Mahāvihāravāsīno bhikkhū taṃ nivāretuṃ asakkontā punapi tato apakkamiṃsu. Tadāpi mahāvihāro nava māsāni bhikkhūhi suñño ahosi. Rājā pana attano ajjhāsavāseneva tattha **jetavanavihāraṃ** kāretvā tassa kuhakatissattherassa adāsiyeva. Tattha dakkhiṇagirivihārato **sāgaliyā** bhikkhū āgantvā vaṃsiṃsu. Pacchā ca te **ambasāmaṇerasilākā**larañño kāle (1067-1080-bu-va) vetullavādīno ahesuṃ [[mahāvamse 37, 32-](#)

[gāthādīsu, nikāyasaṅgahe 15-piṭṭhe](#)].

Evam ācariyabuddhaghosattherassa sīhaḍadīpamāgamanakālato (965-bu-va) pubbeveva visuddhattheravādīhi mahāvihāravāsīhi viruddhasamayā **abhayagirivāsino** (455-bu-va) **sāgalīyā** (797-810-bu-va) **jetavanavāsino** (829-845-bu-va) cāti tayo nikāyā uppannā ahesuṃ. Tesu pana abhayagirivāsino yeva visesato pākāṭā ceva honti balavanto ca. Tathā hi te visuddhattheravādapiṭakañca vajjiputtakapariyāpannadhammarucinikāyapiṭakañca mahisāsakādinikāyapiṭakañca mahāyānapīṭakañca sampāṭicchanti. Tesu dhammarucinikāyapiṭakassa sampāṭicchitabhāvo pākāṭoyeva. Mahisāsakādinikāyapiṭakassa sampāṭicchitabhāvo pana **phāhiyannā**massa cinabhikkhuno addhānakkamasallakkhaṇakathāya ceva aṭṭhakathāsu paṭikkhittavaṇṇapiṭakādināmavasena ca veditabbo, tathā mahāyānapīṭakassa sampāṭicchitabhāvopi.

Phāhiyamaddhānakkamakathā

Phāhiyannāmena hi cinabhikkhunā 956-buddhavassee sīhaḍadīpato sakkatabhāsāropitaṃ mahisāsakavinayapiṭakañca dīghāgamo ca saṃyuttāgamo ca sannipāṭapiṭakañca attanā saha cinaraṭṭhamānīṭanti tassa addhānakkamakathāyaṃ dassitaṃ. Tañca sabbaṃ abhayagirivihāratoyeva laddhamassa, mahāvihāravāsīnaṃ sakkatāropitapiṭakābhāvato. Aṭṭhakathāyaṃ paṭikkhittavaṇṇapiṭakādīni ca tattheva bhavēyyuṃ, mahāvihāravāsīhi tesam appaṭiggahitabhāvato. Tathā “phāhiyambhikkhussa sīhaḍadīpe paṭivasanakāle (954-956-bu-va) mahāvihāre tisahassamattā bhikkhū vasanti, te theravādapiṭakameva uggaṇhanti, na mahāyānapīṭakaṃ. Abhayagirivihāre pañcasahassamattā bhikkhū vasanti, te pana dvepi piṭakāni uggaṇhanti **mahāyānapīṭakañceva theravādapiṭakañcā**”ti ca teneva cinabhikkhunā dassitaṃ.

Yasmā pana abhayagirivāsino mahāyānapīṭakampi uggaṇhanti, tasmā tasmim vihāre mahāyānikānaṃ padhānācariyabhūtehi assaghosanaḡajjunehi kataganthāpi saṃvijjamaṇāyeva bhavēyyuṃ, tatoyeva tesam nayañca nāmañca ācariyabuddhaghosattheropi aññepi taṃkālikā mahāvihāravāsino sutasampannā therā jāneyyumuṃyeva. Apica dakkhiṇāndiyaraṭṭhe samuddasamīpe guntājanapade **nāḡarajunaḡḍaṃ** nāma ṭhānamatthi, yattha **nāḡajjuno** mahāyānikānaṃ padhānācariyabhūto vasanto buddhasāsanam patiṭṭhāpesi. Ācariyabuddhaghosassa ca tandesikabhāvanimittam dissati, tam pacchato (33-piṭṭhe) āvibhavissati. Tasmāpi ācariyabuddhaghosatthero nāḡajjunassa ca assaghosassa ca nayañca nāmañca jāneyyayevāti sakkā anuminituṃ.

Jānatoyeva pana tesam nayassa vā nāmassa vā attano aṭṭhakathāyamappakāsanaṃ tesam nikāyantarahāvato yevassa. Tathā hi tesam assaghosanaḡajjunānaṃ **assaghoso** [(570-670-buddhavassabbhantare)] theravādato bhinnesu ekādasasu gaṇesu **sabbatthivādagaṇe** pariyāpanno, **nāḡajjuno** ca **mahāsaṅghika-cetiya**vādigaṇādīhi jāte **mahāyānanikāye** pariyāpanno, mahāvihāravāsino ca āditoyeva paṭṭhāya nikāyantarasamayehi asammissanattam attano piṭakaṃ atīva ādaraṃ katvā rakkhanti, ayañca ācariyabuddhaghoso tesamaññataro. Vuttañhi tassa ganthanigamanesu “**mahāvihāravāsīnaṃ vaṃsālaṅkārahūtenā**”ti. Tasmā “ācariyabuddhaghoso tesam nayaṃ jānantoyeva attano ganthesu nikāyantarasamayehi asammissanattam nappakāsesī”ti veditabbaṃ.

Ettāvata ca yāni “bodhimaṇḍasamīpamhi, jāto brāhmaṇamaṇavo”tiādīnā vuttassa mahāvamsavacanassa vicāraṇamukhena ācariyabuddhaghosassa vambhanavacanāni dhammānandakosambinā vuttāni, tāni amūlakabhāvena anuvicāritāni. Tathāpi “ācariyabuddhaghoso bodhimaṇḍasamīpe jāto”ti etaṃ pana attham sādhetuṃ daḷhakāraṇam na dissateva ṭhapetvā tam mahāvamsavacanam, yampi **buddhaghosuppattiyam** vuttaṃ, tampi mahāvamsameva nissāya vuttavacanattā na daḷhakāraṇam hotīti.

Marammaraṭṭhikabhāvakathā

Ekacce pana marammaraṭṭhikā “ācariyabuddhaghoso marammaraṭṭhe **sathuṃ** nāma nagarato **sīhaḷadīpaṃ** gantvā saṅghaṭṭhakathāyo akāsi”ti vadanti. Taṃ dhammānandena anujānitvā “tampi thokaṃ yuttisampannaṃ, ahaṃ evaṃ saddahāmi ‘buddhaghoso dakkhiṇāndiyaraṭṭhe **telaṅga**jātiko’ti, telaṅgajātikā ca bahū janā **marammaraṭṭhe** ca **indocina** raṭṭhe ca gantvā vasanti, **talhiṇa?** Iti vohāro ca tatoyeva telaṅgapadato uppanno. Tathā ‘buddhaghoso aṭṭhakathāyo katvā sīhaḷadīpato marammaraṭṭhaṃ gantvā pacchimbhāge tattheva vasī’tipi gahetuṃ sakkā, tassa hi ganthā marammaraṭṭhe sīharaṭṭhatopi surakkhitatarā hontī”ti ca vatvā patitṭhāpitaṃ.

Dakkhiṇāndiyaraṭṭhikabhāvayutti

Bahū pana ādhunikā vicakkhaṇā dhammānandādayo “ācariyabuddhaghosathero **dakkhiṇāndiyaraṭṭhiko**”ti vadanti. Ayaṃ panettha yutti, yebhuyyena hi aṭṭhakathāṭikākārā therā dakkhiṇāndiyaraṭṭhikāyeva. Tathā hi buddhavamsaṭṭhakathāya ca abhidhammāvatāraṭṭhakathāya ca vinayavinicchayaṭṭhakathāya ca kāraḷo **ācariyabuddhadattathero** coḷaraṭṭhe tambapaṇṇinadiyaṃ **uraganagare** jāto ācariyabuddhaghosena ekakāliko ca. Paramatthavinicchaya-nāmarūpapariccheda-abhidhammatthasaṅghānaṃ kāraḷo **ācariyaanuruddhatthero** [ekacce pana vadanti-paramatthavinicchaya kāraḷo eko, nāmarūpapariccheda-abhidhammatthasaṅghānaṃ kāraḷo ekoti dve **anuruddhattherāti**] **kañcivararaṭṭhe kāverinagara**jātiko. Khuddakanikāyapariyāpannaudānādīpāḷiyā saṃvaṇṇanābhūtāya paramatthadīpaniyā kāraḷo **ācariyadhammapālattheropi** dakkhiṇāndiyaraṭṭhe kañcipurajātiko. Tathēvāyampīti vedītabbo. Vuttañhi **manorathapūraṇiyā** nāma aṅguttaraṭṭhakathāya nigamana –

“Āyācito sumatinā, therena bhadantajotipālena;
Kañcipurādīsū mayā, pubbe saddhiṃ vasantenā”ti.

Ettha ca **kañcipuraṃ** nāma madarasanagarassa īsakaṃ pacchimanissite dakkhiṇadisābhāge pañcacattālīsamilappamaṇe padese idāni kañjīvara itī voharitanagarameva.

Tathā **papañcasūdaniyā** nāma majjhimatṭhakathāya nigamanepi –

“Āyācito sumatinā, therena buddhamittena;
Pubbe mayūradūta [mayūrarūpa (sī.), mayūrasutta (syā.)] paṭṭanamhi saddhiṃ vasantenā”ti –
vuttaṃ.

Ettha ca **mayūradūtapattanaṃ** nāma idāni madarasanagarasamīpe milapora itī voharitaṭṭhānanti porāṇappavattigavesīhi vuttaṃ.

Imāhi pana nigamanagāthāhi dakkhiṇāndiyaraṭṭheyeva nivutthapubbataṃ pakāseti, bodhimaṇḍasamīpe vā, marammaraṭṭhe vā nivutthapubbatāya pakāsanaṇca na dissati. Tena ācariyabuddhaghoso dakkhiṇāndiyaraṭṭhiko na hotīti na sakkā paṭikkhipituṃ.

Samantapāsādikāyampi vinayaṭṭhakathāyaṃ (3, 13) ācariyena evaṃ vuttaṃ –

“Yaṃ pana andhakaṭṭhakathāyaṃ ‘aparikkhitte pamukhe anāpattīti bhūmiyaṃ vinā jagatiyā pamukhaṃ sandhāya kathita’nti vuttaṃ, taṃ andhakaṭṭhe pāṭekkasannivesā ekacchadanā gabbhapāḷiyo sandhāya vutta’nti.

Iminā pana vacanena “andhakaṭṭhakathā andhakarattṭhikehi therehi katā”ti pākaṭā hoti, ācariyabuddhaghosopi ca andhakaṭṭhakathāya sandhāyabhāsitaṃ tandesikagabbhapāḷisannivesākārampi suṭṭhu jānāti, tasmā tandesiko na hotīti na sakkā vattunti.

Tathā imassapi visuddhimaggassa nigamane – “**moraṇḍakheṭakavattabbenā**”ti vuttaṃ. Ettha ca **kheṭoti** padassa gāmoti vā, jānapadānaṃ kassakānaṃ nivāsoti vā, khuddakanagaranti vā tayo atthā sakkatābhidhāne pakāsītā, dakkhiṇāndiyaratṭhesu ca yāvajjatanāpi gāmo **kheḍāti** voharīyati. Tasmā moraṇḍavhaye kheṭe jāto moraṇḍakheṭako, moraṇḍakheṭako iti vattabbo moraṇḍakheṭakavattabbo, tena moraṇḍakheṭakavattabbenāti vacanatthaṃ katvā “moraṇḍagāme jātoti vattabbena therenā”ti attho gahetabbo. Idāni pana dakkhiṇāndiyaratṭhe **guntājanapade** nāgārajunaṅḍato ekapaṇṇāsamilamatte (51) amaravatito ca atṭhapaṇṇāsamilamatte (58) padese **kotanemalipurīti** ca **gundalapallīti** ca voharitaṃ ṭhānadvayamatthi, tattha ca bahūni buddhasāsanikaporaṇasantakāni diṭṭhāni, **nemalīti** telaguvohāro ca morassa, **gundalu** iti ca aṇḍassa, tasmā taṃ ṭhānadvayameva pubbe **moraṇḍakheṭoti** voharito **ācariyabuddhaghosassa jātigāmo** bhaveyyāti porāṇaṭṭhānagavesīhi gahito. Yasmā panetaṃ “moraṇḍakheṭakavattabbenā”ti padaṃ “moraṇḍagāmajātenā”ti padaṃ viya pālīnayānucchavikaṃ na hoti, aññehi ca bahūhi visesanapadehi ekato aṭṭhatvā visesyapadassa pacchato viṣuṃ ṭhitaṃ, āgamaṭṭhakathādīsu ca na dissati, tasmā etaṃ kenaci taṃkālīkena ācariyassa jātiṭṭhānaṃ sañjānantaṃ pakkhittaṃ viya dissatīti.

Imesu pana tīsu “ācariyabuddhaghoso bodhimaṇḍasamīpe jātoti ca marammarattṭhikoti ca dakkhiṇāndiyaratṭhiko”ti ca vuttavacanesu pacchimameva balavataraṃ hoti ācariyas seva vacananissittā, tasmā tadeva nissāya ācariyabuddhaghosattherassa uppatti evaṃ vedittabbā.

Ācariyabuddhaghosattherassa aṭṭhuppatti

Ācariyabuddhaghoso dasame buddhavassasatake (901-1000-bu-va) **dakkhiṇāndiyaratṭhe moraṇḍagāme** brāhmaṇakule jāto, so tīsu vedesu ceva sabbavijjāsippaganthesu ca pāraṅgato hutvā buddhasāsanadhammaṃ sutvā tampi uggaṇhitukāmo tasmimyeva dakkhiṇāndiyaratṭhe ekasmiṃ theravādikavihāre **mahāvihāravāsīnaṃ** revatatttherappamukhānaṃ bhikkhūnaṃ santike pabbajjañceva upasampadañca gaṇhitvā piṭakattayapāḷimuggaṇhi. So evaṃ piṭakattayapāḷimuggaṇhantoyeva aññāsi “ayamekāyanamaggo dassanavisuddhiyā nibbānasacchikiriyāyā”ti. Ācariyupajjhāyā ca tassa viṣiṭṭhañāṇappabhāvasampannabhāvaṃ ñatvā “imassa buddhasāsane kittighoso buddhassa viya pavattissatī”ti sampassamānā “**buddhaghoso**”ti nāmamakāṃsu. Tena vuttaṃ “buddhaghosoti garūhi gahitanāmadheyyenā”ti.

So evaṃ piṭakattayapāḷimuggaṇhitvā **madarasa** nagarasamīpaṭṭhānabhūte **mayūradūtaṭṭhanamhi** ca **kañcipurādīsu** ca vasanto **andhakaṭṭhakathāya** paricayaṃ katvā tāya asantuttṭhacitto sīhaḷaṭṭhakathāsupi paricayaṃ kātukāmo tā ca pālībhāsamāropetvā abhinavīkātumāsīsanto sīhaḷadīpamagamāsi. Tasmīñca kāle sīhaḷadīpe **mahānāmo** nāma rājā rajjaṃ kāreti, so ca rājā **abhayagirivāsīsu** pasanno teyeva visesato paggaṇhāti.

Ekacce pana ādhunikā vicakkhaṇā evaṃ vadanti “ācariyabuddhaghosassa sīhaḷadīpāgamanena **sirimeghavaṇṇarājakālato** (846-bu-va) puretaraṃyeva bhavitabba”nti. Idañca nesam kārānaṃ, tassa rañño navavassakāle (855-bu-va) buddhassa **dāṭhādihātukaliṅgarattṭhato** sīhaḷadīpamānītā, tato paṭṭhāya sīhaḷarājāno anusaṃvaccharaṃ mahantaṃ dhātupūjāussavaṃ karonti. Yadi ca ācariyabuddhaghoso tato pacchā sīhaḷadīpamāgaccheyya, tampi pāsādikaṃ mahussavaṃ disvā attano ganthesu pakāseyya yathā phāhiyaṃ nāma cinabhikkhu mahānāmarājakāle (953-975-bu-va) taṃ disvā attano addhānakkamakathāyaṃ pakāsesi, na pana ācariyassa ganthesu taṃpakāsānā dissati, tenetaṃ ñāyati “ācariyabuddhaghoso dāṭhādihātusampattakālato (855-bu-va) puretaraṃyeva sīhaḷadīpamāgantvā aṭṭhakathāyo akāsī”ti. Taṃ pana na daḷhakārānaṃ hoti, tipīṭakapāḷiyā hi atthasaṃvaṇṇanāya yaṃ vā taṃ

vā attano paccakkhadīṭṭhaṃ pakāsetabbaṃ na hoti, na ca atthasaṃvaṇṇanā addhānakkamakathāsadisā. Kiñca bhiyyo, samantapāsādikāya vinayaṭṭhakathāyaṃ dīpavaṃsatopi kiñci ānetvā pakāsitaṃ, dīpavaṃse ca yāva mahāsenarājakālā (819-845-bu-va) pavatti pakāsītāti sirimeghavaṇṇarājakālato (845-873-bu-va) pubbe dīpavaṃsoyeva likhito na bhavēyya. Yadi ca aṭṭhakathāyo tato pubbeyeva katā bhavēyyuṃ, kathaṃ tattha dīpavaṃso sakkā pakāsetunti.

Ācariyabuddhaghoso pana sīhaḷadīpaṃ pattakāle (965-bu-va) **mahāvihārameva** gantvā tattha sīhaḷamahātherānaṃ santike sīhaḷaṭṭhakathāyo suṇi. Vuttañhi samantapāsādikāyaṃ –

“Mahāaṭṭhakathañceva, mahāpaccarimeva ca;
Kurundiñcāti tissopi, sīhaḷaṭṭhakathā imā.

Buddhamittoti nāmena, vissutassa yasassino;
Vinayaññussa dhīrassa, sutvā therassa santike”ti [[pari. aṭṭha. nigamanakathā](#)].

Iminā pana aṭṭhakathāvacanena mahāaṭṭhakathādīnaṃ tissannaṃyeva aṭṭhakathānaṃ sutabhāvo dassito. Samantapāsādikāyaṃ pana saṅkhepaandhakathānaṃpi vinicchayo dassitoyeva, kasmā pana tā ācariyena sīhaḷattherānaṃ santike na sutāti? Tāsu hi andhakathā tava andhakarathābhāvato, kataparicayabhāvato ca na sutāti pākaṭoyevāyamatto. Saṅkhepaṭṭhakathā pana mahāpaccariṭṭhakathāya saṃkhittamattabhāvato na sutāti veditabbā. Tathā hi **vajirabuddhiṭṭkāyaṃ** ganthārambhasaṃvaṇṇanāyaṃ [[vijira. ṭī. ganthārambhakathāvaṇṇanā](#)] cūlapaccariṭṭhakathāandhakathānaṃpi **ādi**-saddena saṅgahitabhāvo vutto, **sāratthadīpanī-vimativinodanī**ṭṭkāsu [[sārattha. ṭī. 1.92 pācittiyakaṇḍa](#); [vi. vi. ṭī. 1.ganthārambhakathāvaṇṇanā](#)] pana andhakaṣaṅkhepaṭṭhakathānaṃ saṅgahitabhāvo vutto, samantapāsādikāyañca cūlapaccarīti nāmaṃ kuhiñcipi na dissati, mahāaṭṭhakathā mahāpaccarī kurundī andhakaṣaṅkhepaṭṭhakathāti imāniyeva nāmāni dissanti, bahūsu ca ṭhānesu “saṅkhepaṭṭhakathāyaṃ pana mahāpaccariyañca vutta”ntiadinā [[pārā. aṭṭha. 1.94](#)] dvinnampi samānavinicchayo dassito. Tasmā vajirabuddhiyaṃ cūlapaccarīti vuttaṭṭhakathā mahāpaccarito uddharitvā saṅkhepena kataṭṭhakathā bhavēyya, sā ca saṅkhepena katattā **saṅkhepaṭṭhakathā** nāma jātā bhavēyya. Evañca sati mahāpaccariyā sutāya sāpi sutāyeva hotīti na sā ācariyena sutāti veditabbā.

Evamaṃ sīhaḷaṭṭhakathāyo suṇantasseva ācariyabuddhaghosassa tikkhagambhīrajavanañāṇappabhāvavisesasampannabhāvañca paramavisuddhasaddhābuddhivīriyapaṭimaṇḍitasīlacārajjavamaddavādiguṇasamudaya-samuditabhāvañca sakasamayasaṃvāntaragahanajjhogāhaṇasamatthapaññāveyyattiyasamannāgatabhāvañca anekasatthantarocitasamvaṇṇanāyasaṃvāntaragahanajjhogāhaṇasamatthapaññāveyyattiyasamannāgatabhāvañca nātva tāmsavanakiccapariṇīṭṭhitakāle **saṅghapālā**dayo therā taṃ visuddhimaggādiganthānaṃ karaṇatthāya visuṃ visuṃ āyācīmsu. Ettha ca ācariyassa yathāvuttaguṇehi sampannabhāvo attano vacaneneva pākaṭo. Vuttañhi attano ganthanigamanesu –

“Paramavisuddhasaddhābuddhivīriyapaṭimaṇḍitena
sīlacārajjavamaddavādiguṇasamudayasamuditena
sakasamayasaṃvāntaragahanajjhogāhaṇasamatthena paññāveyyattiyasamannāgatenā”tiadi.

Tattha **sakasamayasaṃvāntaragahanajjhogāhaṇasamatthenā**ti padena ācariyabuddhaghosatthero mahāvihāravāsīnaṃ visuddhattheravādīnaṃ desanāyasaṅkhāte sakasamaye ca mahāsaṅghikādīmahāyānikapariyosānānaṃ nikāyantarabhūtānaṃ paresaṃ piṭakaganthantaravādanayasaṅkhāte parasamaye ca tathā taṃkālikāññatitthiyasamaṇabrāhmaṇānaṃ vedattayādīsaṅkhāte parasamaye ca kovido, tesamaṃ sakasamayaparasamayānaṃ durogāhadubbodhatthasaṅkhāte gahanaṭṭhānēpi ca ogāhituṃ samatthoti dīpeti. **Paññāveyyattiyasamannāgatoti** padena ācariyabuddhaghosatthero porāṇaṭṭhakathāyo saṅkhipituñca

paṭisaṅkharituñca samatthoti dīpetīti veditabbo.

Āyācanakāraṇaṃ

Kasmā pana te taṃ āyāciṃsūti? Vuccate, mahāvihāravāsino hi āditoyeva paṭṭhāya piṭakattayaṃ yathā tīsu saṅgītīsu pāḷibhāsāya saṅgītaṃ, yathā ca **vaṭṭagāmaṇirājakāle** (455-467-bu-va) potthakesu āropitaṃ, tathā porāṇaṃ pāḷipīṭakameva uggaṇhanti ceva vācenti ca, na sakkatāropitapiṭakaṃ. Aṭṭhakathāyo ca tivassasatamattato pure katā. Tathā hi aṭṭhakathāsu **vasabharājakālato** (609-653-bu-0) pacchā sīhaḷikattherānañceva aññesañca vatthu na dissati ṭhapetvā **mahāsenarājavatthuṃ** [[pārā. aṭṭha. 2.236-237](#)], yāva ācariyabuddhaghosakālāpi ca tā eva porāṇaṭṭhakathāyo atthi na abhinavīkatā. Tena tesam piṭakesu yebhuyyena janā paricayaṃ kātuṃ asaṅjātābhilāsā honti asaṅjātussāhā. Dīpantaresu ca attano piṭakaṃ pattharāpetuṃ na sakkonti aṭṭhakathānaṃ dīpabhāsāya abhisāṅkhatattā. Abhayagīrivāsino pana vaṭṭagāmaṇirājakālato paṭṭhāya sakkatabhāsāropitaṃ dhammarucinikāyādiṭakampi mahāyānapīṭakampi navam navam pariyāpuṇanti ceva vācenti ca, tena tesam piṭakesu yebhuyyena janā paricayaṃ kātuṃ saṅjātābhilāsā honti saṅjātussāhā, navam navameva hi sattā piyāyanti. Tatoyeva te dīpantaresu attano vādaṃ pattharāpetuṃ sakkonti. Tasmā te mahāvihāravāsino therā attano sīhaḷaṭṭhakathāyo pāḷibhāsāya abhisāṅkharitukāmā tathā kātuṃ samatthaṃ ācariyabuddhaghosattherassa ñāṇappabhāvavisesaṃ yathāvuttagaṇasampannabhāvañca ñatvā āyāciṃsūti veditabbaṃ.

Visuddhimaggassa karaṇaṃ

Tesu tāva visuddhimaggaṃ ācariyabuddhaghoso saṅghapālattherena ajjesito mahāvihārassa dakkhiṇabhāge padhānaghare mahānigamassāmino pāsāde [[pari. aṭṭha. nigamanakathā](#)] vasanto akāsi. Ettāvātā ca “so panesa visuddhimaggo kena kato, kadā kato, kattha kato, kasmā kato” ti imesaṃ pañhānamattho vitthārena vibhāvito hoti.

Idāni kimatthaṃ katotiādīnaṃ pañhānamatthaṃ pakāsayissāma. Tattha **kimatthaṃ katoti** etassa pana pañhassa attho ācariyeneva pakāsito. Kathaṃ?

“Sudullabhaṃ labhitvāna, pabbajjaṃ jinasāsane;
Sīlādisaṅghaṃ khemaṃ, ujum maggaṃ visuddhiyā.

Yathābhūtaṃ ajānantā, suddhikāmāpi ye idha;
Visuddhiṃ nādhigacchanti, vāyamantāpi yogino.

Tesaṃ pāmojjakaraṇaṃ, suvisuddhavinicchayaṃ;
Mahāvihāravāsīnaṃ, desanāyanissitaṃ.

Visuddhimaggaṃ bhāsissaṃ, taṃ me sakkacca bhāsato;
Visuddhikāmā sabbepi, nisāmayatha sādhave” ti [[visuddhi. 1.2](#)].

Tasmā esa visuddhimaggo visuddhisāṅkhātaniḥṅgānākaṃ sādhujanānaṃ sīlasamādhīpaññāsāṅkhātassa visuddhimaggassa yāthāvato jānanatthāya katoti padhānappayojanavasena veditabbo. Appadhānappayojanavasena pana catūsu āgamaṭṭhakathāsu ganthasallahukabhāvattāyapi katoti veditabbo. Tathā hi vuttaṃ **āgamaṭṭhakathāsu** –

“Majjhe visuddhimaggo, esa catunnampi āgamānañhi;
Ṭhatvā pakāsayissati, tattha yathābhāsitamatthaṃ;
Iccheva me kato” ti [[dī. ni. aṭṭha. 1.ganthārambhakathā](#)].

Tannissayo

Kim nissāya katoti etassapī pañhassa attho ācariyeneva pakāsīto. Vuttañhi ettha ganthārambhe –

“Mahāvihāravāsīnaṃ, desanānayanissita”nti [[visuddhi. 1.2](#)].

Tathā nigamanepi –

“Tesam sīlādibhedānaṃ, atthānaṃ yo vinicchayo;
Pañcannampi nikāyānaṃ, vutto aṭṭhakathānaye.

Samāharitvā taṃ sabbaṃ, yebhuyyena sanicchayo;
Sabbasaṅkaradosehi, mutto yasmā pakāsīto”ti [[dī. ni. aṭṭha. 1.ganthārambhakathā](#)].

Iminā pana vacanena ayamatto pākato hoti – “visuddhimaggaṃ kurumāno ācariyo mahāvihāravāsīnaṃ desanānayasāṅkhātā pañcannampi nikāyānaṃ porāṇaṭṭhakathāyo nissāya tāsu vuttaṃ gahetabbaṃ sabbaṃ vinicchayaṃ samāharitvā akāsi”ti. Tasmā yā yā ettha padavaṇṇanā vā vinicchayo vā sādhakavatthu vā dassiyati, taṃ sabbaṃ tassa tassa niddhāritapālipadassanikāyasaṃvaṇṇanābhūtāya porāṇasihaḷaṭṭhakathāto ānetvā bhāsāparivattanavaseneva dassitanti veditabbaṃ. Ayampi hi visuddhimaggo na kevalaṃ attano ñāṇappabhāvena kato, visuṃ pakaraṇabhāvena ca, atha kho catunnampi āgamaṭṭhakathānaṃ **avayavabhāvene**va kato. Vuttañhi tāsam nigamane –

“Ekūnasatṭhimatto, visuddhimaggopi bhāṇavārehi;
Atthappakāsanatthāya, āgamānaṃ kato yasmā.

Tasmā tena sahāyaṃ, aṭṭhakathā bhāṇavāragāṇanāya;
Suparimitaparicchinnaṃ, cattālīsasataṃ hoti”tiādi [[dī. ni. aṭṭha. 3.nigamanakathā](#)].

Yā pana visuddhimagge maggāmaggañānadassanavisuddhiniddese “ayaṃ tāva visuddhikathāyaṃ nayo. Ariyavaṃsakathāyaṃ panā”tiādinā [[visuddhi. 2.717](#)] dve kathā vuttā, tāpi mahāvihāravāsīnaṃ desanānaye antogadhā imassa visuddhimaggassa nissayāyevāti veditabbāti.

Takkaraṇappakāro

Kena pakārena katoti ettha anantarapañhe vuttappakāreneva kato. Tathā hi ācariyo saṃyuttanikāyato

“Sīle patiṭṭhāya naro sapañño, cittaṃ paññañca bhāvayaṃ;
Ātāpī nipako bhikkhu, so imaṃ vijaṭṭhaye jaṭa”nti [[saṃ. ni. 1.23](#)] –

Imaṃ gāthaṃ paṭhamam dassetvā tattha padhānavasena vuttā sīlasamādhipaññāyo visuṃ visuṃ vitthārato vibhajitvā akāsi. Evaṃ kurumāno ca pañcahipi nikāyehi sīlasamādhipaññāpaṭisaṃyuttāni suttapadāni uddharitvā tesam atthañca sihaḷaṭṭhakathāhi bhāsāparivattanavasena dassetvā tāsu vuttāni sihaḷikavatthūni ca vinicchaye ca pakāsesi. Visesato pana tasmim kāle pākātā sakasamayaviruddhā समयantarā ca bahūsu thānesu dassetvā sahetukaṃ paṭikkhittā. Kathaṃ?

Tattha hi **cariyāvaṇṇanāyaṃ** “tatra purimā tāva tisso cariyā pubbācīṇṇanidānā dhātudosanidānā cāti ekacce vadanti. Pubbe kira iṭṭhappayogasubhakammabahulo rāgacarito hoti, saggā vā cavitvā

idhūpapanno. Pubbe chedanavadhabandhanaverakammabahulo dosacarito hoti, nirayanāgayonīhi vā cavitvā idhūpapanno. Pubbe majjapānabahulo sutaparipucchāvihīno ca mohacarito hoti, tiracchānayoniyā vā cavitvā idhūpapannoti evaṃ pubbāciṇṇanidānāti vadanti. Dvinnaṃ pana dhātūnaṃ ussannattā puggalo mohacarito hoti pathavīdhātuyā ca āpodhātuyā ca. Itarāsaṃ dvinnaṃ ussannattā dosacarito. Sabbāsaṃ samattā pana rāgacaritoti. Dosesu ca semhādhiko rāgacarito hoti. Vātādhiko mohacarito. Semhādhiko vā mohacarito. Vātādhiko rāgacaritoti evaṃ dhātudosanidānāti vadantī”ti ekaccevēdaṃ dassetvā so “tatha yasmā pubbe iṭṭhappayogasubhakammabahulāpi saggā cavitvā idhūpapannāpi ca na sabbe rāgacaritāneva honti, na itare vā dosamohacaritā. Evaṃ dhātūnañca yathāvutteneva nayena ussadanīyamo nāma natthi. Dosaniyame ca rāgamohadvayameva vuttaṃ, tampi ca pubbāparaviruddhameva. Tasmā sabbametaṃ aparicchinnavacana”nti [visuddhi. 1.44] paṭikkhitto. Taṃ **paramatthamañjūsāya** nāma **visuddhimaggamahāṭīkāyaṃ** “ekacceti **upatissattheraṃ** sandhāyāha, tena hi **vimuttimagge** tathā vutta”ntiadinā vaṇṇitaṃ [visuddhi. ṭī. 1.44].

Vimuttimaggapakaraṇaṃ

Ko so **vimuttimaggo** nāma? Visuddhimaggo viya sīlasamādhīpaññānaṃ visuṃ visuṃ vibhajitvā dīpako eko paṭipattigantho. Tattha hi –

“Sīlaṃ samādhī paññā ca, vimutti ca anuttarā;
Anubuddhā ime dhammā, gotamena yasassinā”ti [dī. ni. 2.186; a. ni. 4.1] –

Imaṃ gāthaṃ paṭhamaṃ dassetvā tadatthavaṇṇanāvasena sīlasamādhīpaññāvīyavimuttiyo visuṃ visuṃ vibhajitvā dīpitā. So pana gantho idāni **cīnaraṭṭhēyeva** dīṭṭho, cīnabhāsāya ca parivattito (1048-bu-va) **saṅghapālena** nāma bhikkhunā. Kena pana so kuto ca tattha ānītoti na pākaṭametaṃ. Tassa pana saṅghapālassa ācariyo **guṇabhadro** nāma mahāyāniko bhikkhu majjhīmaindiyadesiko, so indīyaraṭṭhato cīnaraṭṭhaṃ gacchanto paṭhamaṃ sīhaladīpaṃ gantvā tato (978-bu-va) cīnaraṭṭhaṃ gato. Tadā so tena ānīto bhavēyya [vimuttimagga, visuddhimagga].

Tasmiñhi vimuttimagge pubbāciṇṇanidānadassanaṃ dhātunīdānadassanañca yatheva visuddhimagge ekaccevēdo, tathevāgataṃ. Dosanīdānadassane pana “semhādhiko rāgacarito, **pīttādhiko dosacarito**, vātādhiko mohacarito. Semhādhiko vā mohacarito, vātādhiko rāgacarito”ti tiṇṇampi rāgadosamohānaṃ dosaniyamo vutto. Ācariyabuddhaghosena dīṭṭhavimuttimaggapotthake pana “pīttādhiko dosacarito”ti pāṭho ūno bhavēyya.

Aññānīpi bahūni visuddhimagge paṭikkhīttāni tattha vimuttimagge gahetabbabhāvena dissanti. Kathaṃ?

Sīlanīdese (1, 8-piṭṭhe) “aññe pana sīraṭṭho sīlattho, sīlattho sīlatthoti evamādināpi nayenettha atthaṃ vaṇṇayantī”ti paṭikkhitto atthopi tattha gahetabbabhāvena dissati.

Tathā **dhutaṅganīdese** (1, 78-piṭṭhe) “yesampi kusalattikavinimuttaṃ dhutaṅgaṃ, tesam atthato dhutaṅgameva natthi, asantaṃ kassa dhunanato dhutaṅgaṃ nāma bhavissati, dhutaṅge samādaya vattatīti vacanavīrodhopi ca nesaṃ āpajjati, tasmā taṃ na gahetabba”nti paṭikkhītaṃ **paññattīdhutaṅgampi** tattha dissati. Mahāṭīkāyaṃ (1-104) pana “yesanti **abhayagīrīvāsike** sandhāyāha, te hi dhutaṅgaṃ nāma paññattīti vadantī”ti vaṇṇitaṃ.

Tathā **pathavīkasiṇanīdese** (1, 144) “paṭīpadāvisuddhi nāma sasambhāriko upacāro, upekkhānubrūhanā nāma appanā, sampahaṃsanā nāma paccavekkhāṇāti evameke vaṇṇayantī”tiadinā paṭikkhīttākevēdopi tattha dissati. Mahāṭīkāyaṃ (1, 172) pana “eketi abhayagīrīvāsīno”ti vaṇṇitaṃ.

Tathā **khandhaniddese** (2, 80-piṭṭhe) “balarūpaṃ sambhavarūpaṃ jātirūpaṃ rogarūpaṃ ekaccānaṃ matena middharūpa’nti evaṃ aññānīpi rūpāni āharitvā porāṇaṭṭhakathāyaṃ tesāṃ paṭikkhittabhāvo pakāsīto. Mahāṭīkāyaṃ “ekaccānanti abhayagirivāsīna’nti vaṇṇitaṃ. Tesu jātirūpaṃ middharūpaṃca **vimuttimagge** dassitaṃ. Na kevalaṃ dassanamattameva, atha kho middharūpassa atthibhāvopi “middhaṃ nāma tividdhaṃ āhārajaṃ utujaṃ cittaajañcāti. Tesu **cittajameva nīvaraṇaṃ** hoti, sesā pana dve arahatopi bhavēyyu’ntiādinā sādhitō.

Ettāvata ca vimuttimagge visuddhimaggena asamānatthānaṃ vuttabhāvo ca abhayagirivāsīhi tassa ganthassa paṭiggahitabhāvo ca sakkā ñātuṃ. Aññānīpi pana īdisāni asamānavacanāni bahūni tattha saṃvijjantiyeva, tāni pana sabbāni na sakkā idha dassetuṃ.

Yebhuyyena panassa karaṇappakāro visuddhimaggassa viya hoti. Yā yā hi pālī abhidhammavibhaṅgato vā paṭisambhidāmaggato vā aññāsuttantehi vā ānetvā sādhakabhāvena visuddhimagge dassiyati, tatthapi sā sā pālī yebhuyyena dissateva. Tāsu kañcimattaṃ uddharitvā anuminanatthāya dassayissāma.

Yā visuddhimagge (1, 47-piṭṭhe) “pañca sīlāni paṇātipātassa pahānaṃ sīla’ntiādikā paṭisambhidāmaggapālī dassitā, sā vimuttimaggepi dissateva.

Yañca visuddhimagge (1, 137-piṭṭhe) “samādhi kāmaccchandassa paṭipakkho...pe... vicāro vicikicchāyā’nti vacanaṃ **peṭake** vuttanti dassitaṃ, tañca tatthapi tatheva dassetvā “**tipeṭake** vutta’nti niddiṭṭhaṃ. **Tipeṭake**ti nāmañca peṭakopadesameva sandhāya vuttaṃ bhavēyya. Tattha hi viviceva kāmehīti pāṭhasaṃvaṇṇanāyaṃ “alobhassa pāripūriyā kāmehi viveko sampajjati, adosassa. Amohassa pāripūriyā akusalehi dhammehi viveko sampajjati’nti pāṭhassa tipeṭake vuttabhāvo dassito. So ca pāṭho peṭakopadeso (262-piṭṭhe) “tattha alobhassa pāripūriyā vivitto hoti kāmehī’ntiādinā dissati.

Yathā ca visuddhimagge (1, 258-piṭṭhe) “āyampi kho bhikkhave ānāpānassatisamādhi bhāvito’ntiādikā pālī mahāvaggasaṃyuttakato ānetvā dassitā, tatheva tatthapi.

Yathā ca visuddhimagge (1, 272-piṭṭhe) “assāsādimajjhāpariyosānaṃ satiyā anugacchato’ntiādi pālī ca (1, 273-piṭṭhe) kakacūpamapālī ca paṭisambhidāmaggato ānetvā dassitā, tatheva tatthapi.

Yathā ca visuddhimagge (2, 69-piṭṭhe) “katamā cintāmayā paññā’ntiādikā ca pālī “tattha katamaṃ āyakoṣalla’ntiādikā ca pālī (2, 71-piṭṭhe) “dukkhe ñāṇaṃ atthapaṭisambhidā’ntiādikā ca pālī abhidhammavibhaṅgato ānetvā dassitā, tatheva tatthapi. Sabbāpi ca tattha vuttā ekavidhaduvidhādi paññāpabhedakathā visuddhimagge vuttakathāya yebhuyyena samānāyeva.

“Yena cakkhupasādena, rūpāni manupassati;
Parittaṃ sukhumaṃ etaṃ, ūkāśirasamūpama’nti [[visuddhi. 2.436](#); [dha. sa. aṭṭha. 596](#)] –

Āyampi gāthā vimuttimaggepi āyasmata sārīputtattherena bhāsītābhāveneva dassitā. **Ūkāśirasamūpamanti** padaṃ pana **ūkāśamūpamanti** tattha dissati, tañca paramparalekhakānaṃ pamādalekhamattameva siyā.

Catūsu saccesu visuddhimagge viya vacanatthato lakkhaṇato anūnādhikato kamato antogadhānaṃ pabhedato upamāto ca vinicchayo dassito, so ca yebhuyyena visuddhimaggena [[visuddhi. 2.530](#)] samānoyeva.

Yathā ca visuddhimagge (2, 242-245) sammasanaññākaṭṭhāyaṃ pañcannaṃ khandhānaṃ atītiādiekādasavidhena ca aniccādilakkhaṇattayena ca visuṃ visuṃ sammasananayo dassito, tatheva tatthapi. Cakkhādijarāmarāṇapariyosānesu pana dhammesu dhammavicārapariyosānānaṃ saṭṭhiyā eva

dhammānaṃ aniccādilakkhaṇattayena sammasananayo tatta dassito.

Visuddhimagge pana diṭṭhivisuddhiniddese (2, 230-232-piṭṭhesu) vuttā “yamakaṃ nāmarūpaṅca... pe... ubho bhijjanti paccayā”ti gāthā ca, “na cakkhuto jāyare”tiādikā cha gāthāyo ca, “na sakena balena jāyare”tiādikā cha gāthāyo ca vimuttimagge bhaṅgānupassanāññakathāyaṃ dassitā. Tāsu appamattakoyeva pāṭhabhedo dissati.

Visuddhimagge (2, 261-2-piṭṭhesu) arūpasattakesu ariyavaṃsakathānāyena vutto kalāpato ca yamakato ca sammasananayo vimuttimagge ettheva bhaṅgānupassanāññakathāyaṃ dassito.

Vimuttimagge buddhānussatikathāyaṃ lokavidūti padassa atthavaṇṇanāyaṃ sattalokasaṅkhāralokavasena **dveveva lokā** dassitā, na pana okāsaloko yathā visuddhimagge (1, 199-200-piṭṭhesu).

Ettāvātā ca vimuttimaggo nāma gantho kīdisoti sakkā anuminituṃ. So pana yathā na mahāvihāravāsīnaṃ gantho hoti, evaṃ mahāyānikānāmpi na hotiyeva theravādapīṭakameva nissāya katabhāvato. Yasmā pana tatta na kiñcipi sīhaḷadīpikaṃ nāmaṃ vā theravādo vā dissati, tasmā so sīhaḷadīpe kataganthopi na hoti. Indiyarāṭṭhikaṃ pana nāmaṅca vohāro ca tatta bahūsu ṭhānesu dissati, tasmā indiyarāṭṭhe kataganthova bhaveyya. Yasmā cassa peṭakopadesaṃ nissitabhāvo bahūsu ṭhānesu dissati, visesato pana middharūpassa atthibhāvo ca, arahatopi tassa atthibhāvo ca tameva nissāya dassīyati, **paṭisambhidāmaggaṇṭhipade** ca peṭaketi padassa [paṭi. ma. aṭṭha. 1.1.36] atthavaṇṇanāyaṃ “suttantapīṭakatthāya aṭṭhakathā peṭakaṃ **mahisāsakānaṃ** gantho”ti vaṇṇito. Tasmā eso vimuttimaggo mahisāsakanikāyikena kato bhaveyyāti amhākaṃ mati.

Nissayaṭṭhakathā vibhāvanā

Visuddhimaggo pana na kevalaṃ pubbe vuttappakāreneva kato, atha kho vuccamānappakārenāpi. Tathā hi ācariyabuddhaghosatto porāṇaṭṭhakathāhi samāharitvā bhāsāparivattanavasena dassentopi yā yā atthavaṇṇanā vā vinicchayo vā saṃsayitabbo hoti, tatta tatta vinayaṭṭhakathāyaṃ vuttanti vā (1, 263), vinayaṭṭhakathāsu vuttaṃ, majjhimaṭṭhakathāsu panāti vā (1, 70), aṅguttarabhāṅakāti vā (1, 72), aṭṭhakathācariyānaṃ matānusārena vinicchayoti vā (1, 99), vuttampi cetam aṭṭhakathāsūti vā (1, 118), tam aṭṭhakathāsu paṭikkhittanti vā (1, 134), dīghabhāṅakasaṃyuttabhāṅakānaṃ matanti vā, majjhimbhāṅakā icchantīti vā (1, 267), aṭṭhakathāsu vinicchayoti vā, evaṃ tāva dīghabhāṅakā, majjhimbhāṅakā panāhūti vā (1, 277), aṅguttaraṭṭhakathāyaṃ pana...pe... ayaṃ kamo vutto, so pāḷiyā na sametīti vā (1, 309), evaṃ tāva majjhimbhāṅakā, saṃyuttabhāṅakā panāti vā (2, 62), saṃyuttaṭṭhakathāyaṃ vuttanti vā (2, 63), aṭṭhakathāyaṃ panāti vā (2, 80) evaṃ tamtamattavaṇṇanāvinicchayānaṃ nissayampi vibhāvetvā pacchimajjanānaṃ uppajjamānasamayaṃ vinodentoyeva te dassesi.

Tenimassa visuddhimaggassa karaṇakāle sabbāpi sīhaḷaṭṭhakathāyo ācariyassa santike santīti ca, pubbeyeva tā ācariyena sīhaḷattherānaṃ santike sutāti ca, tāhi gahetabbaṃ sabbam gahetvā ayaṃ visuddhimaggo ācariyena likhitoti ca ayamatto ativiya pākaṭo hoti. Tasmā yaṃ mahāvaṃse –

“Saṅgho gāthādvayaṃ tassā’ dāsi sāmattiyaṃ tavā”tiādīnā “gāthādvayameva oloketvā kiñcipi aññaṃ potthakaṃ anoloketvā ācariyabuddhaghoso visuddhimaggaṃ akāsī”ti adhippāyena abhitthutivacanaṃ vuttaṃ, tam abhitthutimattamevāti veditabbaṃ.

Porāṇavacanadassanaṃ

Na kevalaṃ ācariyo aṭṭhakathāyoyeva nissayabhāvena dassesi, atha kho “porāṇā panāhū”tiādīnā

porāṇānaṃ vacanampi dassesiyeva. Tadettha dvāvīsatiyā ṭhānesu diṭṭhaṃ [visuddhi. 1.15, 137, 142, 217, 252, 303; 2.581, 675-676, 689, 706, 736, 745, 746, 749, 755, 778, 839]. Ke panete porāṇā nāma? Yāva catutthasaṅgītikālā saṅgītikāresu pariyāpannā vā tādisā vā mahātherāti vedītabbā. Tathā hi paṭisambhidāmagge (292-3-piṭṭhesu).

“Obhāse ceva ñāṇe ca, pītiyā ca vikampati...pe...
Dhammuddhaccakusalo hoti, na ca vikkhepaṃ gacchatī”ti –

Evamāgatā gāthāyo idha (273-4-piṭṭhesu) porāṇānaṃ vacanabhāvena dassitā. Yadi cimā gāthāyo saṅgītikārehi pakkhittā bhaveyyuṃ yathā parivārapāliyaṃ (3-piṭṭhe) āgatā ācariyaparamparādīpikā gāthāyo, tā hi samantapāsādikāyaṃ (1, 46-piṭṭhe) porāṇavacanabhāvena dassitā, evaṃ sati teyeva saṅgītikāre porāṇāti vedītabbā. Atha paṭisambhidāmaggadesakeneva bhāsītā bhaveyyuṃ, te viya garukaraṇīyā paccayikā saddhāyitabbakā mahātherā porāṇāti vedītabbā. Samantapāsādikāsumāṅgalavilāsiniādīsu “porāṇā pana evaṃ vaṇṇayanti”tiādīnā vuttaṭṭhānesupi tādisāva ācariyā porāṇāti vuttā.

Vinayaṭṭhakathākaraṇaṃ

Ācariyo pana imaṃ visuddhimaggapakaraṇaṃ yathāvuttappakārena katvā aññāpi tipīṭakaṭṭhakathāyo anukkamena akāsi. Kathaṃ? Samantapāsādikaṃ nāma vinayaṭṭhakathaṃ **buddhasirithherena** ajjesito mahāvihārassa dakkhiṇabhāge padhānagharapariveṇe **mahānigamassāmino** pāsāde vasanto akāsi. Sā panesā **siripālōti** nāmantarassa **mahānāmarañño** vīsativavasse (973-bu-va) āradhā ekavīsativavasse (974-bu-va) niṭṭhānappattā ahoṣi. Tañca pana karonto mahāmahindattherenābhatā sīhaḷabhāsāya saṅkhatā mahāaṭṭhakathaṃ tassā sarīraṃ katvā mahāpaccarīkurundīsankhepaandhakaṭṭhakathāhi ca gahetabbā gahetvā sīhaḷadīpe yāva **vasabharājakālā** pākāṇaṃ porāṇa vinayadharamahātherānaṃ vinicchayabhūtaṃ theravādampi pakkhipitvā akāsi. Vuttañhetā samantapāsādikāyaṃ –

“Saṃvaṇṇanaṃ tañca samārabhanto, tassā mahāaṭṭhakathaṃ sarīraṃ;
Katvā mahāpaccariyaṃ tatheva, kurundināmādisu vissutāsu.

Vinicchayo aṭṭhakathāsu vutto, yo yuttamatthaṃ apariccajanto;
Tatopi antogadhatheravādaṃ, saṃvaṇṇanaṃ samma samārabhissa”nti ca.

“Mahāmeghavanuyyāne, bhūmibhāge patiṭṭhito;
Mahāvihāro yo satthu, mahābodhivibhūsito.

Yaṃ tassa dakkhiṇe bhāge, padhānaghamuttamaṃ;
Suciārittasilena, bhikkhusaṅghena sevitāṃ.

Uḷarakulasambhūto, saṅghupaṭṭhāyako sadā;
Anākulāya saddhāya, pasanno ratanattaye.

Mahānigamasāmīti, vissuto tattha kārayi;
Cārupākārasaṅcītaṃ, yaṃ pāsādaṃ manoramamaṃ.

Sandacchāyatarūpetāṃ, sampannasalilāsayaṃ;
Vasatā tatra pāsāde, mahānigamasāmino.

Sucisīlasamācāraṃ, therāṃ **buddhasirivhayaṃ**;

Yā uddisitvā āraddhā, iddhā vinayavaṇṇanā.

Pālayantassa sakalaṃ, laṅkāḍīpaṃ nirabbudaṃ;
Rañño **sirinivāsassa** [siriya nivāsaṭṭhonabhūtaṃ siripālanāmakassa rañño (vimati, antimaviṭṭhe)], **siripālayasassino**.

Samavīsati vasse, jayasamvacchare ayaṃ;
Āraddhā **ekavīsamhi**, sampatte pariniṭṭhitā.

Upaddavākule loke, nirupaddavato ayaṃ;
Ekasamvacchareneva, yathā niṭṭhaṃ upāgatā’ ti [pari. aṭṭha. nigamanakathā] ca.

Ayañca samantapāsādikā vinayaṭṭhakathā adhunā mudditachattasāṅgītipotthakavasena saḥassato upari aṭṭhapaṇṇāsādhikatisatamattapiṭṭhaparimāṇā (1358) hoti, tassā ca ekasamvaccharena niṭṭhāpitattam upanidhāya catuvīsādhikasattasatamattapiṭṭhaparimāṇo (724) visuddhimaggopi antamaso chappañcamāsehi niṭṭhāpito bhavyeyyāti sakkā ñātum. Tasmā yaṃ buddhaghosuppattiyam mahāvamsavacanam nissāya “visuddhimaggo ācariyabuddhaghosena ekaratteneva tikkhattum likhitvā niṭṭhāpito” ti abhitthutivacanam vuttam, tam takkārakassa abhitthutimattamevāti veditabbam.

Nanu ca imissam aṭṭhakathāyaṃ “sumaṅgalavilāsiniya” ntiādinā visesanāmasena āgamaṭṭhakathānam atideso dissati [pārā. aṭṭha. 1.15], kathamimissā tāhi paṭhamataram katabhāvo veditabboti? Ācariyassa aṭṭhakathāsu aññamaññātideso, vinayaṭṭhakassa garukātabbatarabhāvato, mahāvihāravāsīhi visesena garukātabhāvato, saṅgītikamānurūpabhāvato, idheva paripuṇṇanidānakathāpakāsanato, nigamane ca paṭhamam sīhaṭṭhakathāyo sutvā karaṇappakāsanato ṭhapetvā visuddhimaggam ayameva paṭhamam katāti veditabbā. Visuddhimagge pana vinayaṭṭhakathāyanti vā vinayaṭṭhakathāsūti vā majjhimaṭṭhakathāsūti vā evam sāmāññanāmaseneva atideso dissati, na samantapāsādikādivisesanāmasena. Tasmāssa sabbapaṭhamam katabhāvo pākātoyeva. Āgamaṭṭhakathānam idhātideso [pārā. aṭṭha. 1.15] imissāpi tathāti [dī. ni. aṭṭha. 1.8] evam aññamaññātideso pana ācariyassa manasā suvatthitavasena vā sakkā bhavitum, apubbācarimapariniṭṭhāpanena vā. Katham? Ācariyena hi visuddhimaggam sabbaso niṭṭhāpetvā samantapāsādikādiṃ ekekamaṭṭhakatham karonteneva yatha yatha atthavaṇṇanā vitthārato aññāṭṭhakathāsu pakāsetabbā hoti, tatha tatha “imasmiṃ nāma ṭhāne kathessāmi” ti manasā suvatthitam vavatthapetvā tañca atidisitvā yathāvavatthitaṭṭhānappattakāle tam vitthārato kathentena tā katā vā bhavyeyum. Ekekissāya vā niṭṭhānāsannappattakāle tam ṭhapetvā aññañca aññañca tathā katvā sabbāpi apubbācarimam pariniṭṭhāpitā bhavyeyunti evam dvinnam pakārānamaññataravasena ācariyassaṭṭhakathāsu aññamaññātideso hotīti veditabbanti.

Āgamaṭṭhakathākaraṇam

Sumaṅgalavilāsiniṃ nāma dīghanikāyaṭṭhakatham pana ācariyo sumaṅgalapariveṇavāsiniṃ **dāṭhānāgatttherena** āyācito akāsi. Vuttam hetametissā nigamane –

“Āyācito sumaṅgala-pariveṇanivāsiniṃ thiraguṇena;
Dāṭhānāga saṅgha, ttherena theravaṃsanvayena.

Dīghāgamaṃ dasabala-guṇagaṇaparidīpanassa aṭṭhakatham;
Yaṃ ārabhiṃ **sumaṅgala-vilāsiniṃ** nāma nāmena.

Sā hi mahāaṭṭhakathāya, saramādāya niṭṭhitā esā’ ti [dī. ni. aṭṭha. 3. nigamanakathā].

Papañcasūdaniṃ nāma majjhimanikāyaṭṭhakathaṃ bhadanta**buddhamittattherena** pubbe mayūradūtaṭṭhane attanā saddhiṃ vasantena āyācito akāsi. Vuttaṃ hetametissā nigamane –

“Āyācito sumatinā, therena bhadanta**buddhamittena**;
Pubbe **mayūradūtaṭṭha**,**ṭṭhanamhi** saddhiṃ vasantena.

Paravādaḍḍhaṃsanassa, majjhimanikāyaseṭṭhassa;
Yamaḥaṃ **papañcasūdani**-maṭṭhakathaṃ kātumārabhiṃ.

Sā hi mahāaṭṭhakathāya, sāramādāya niṭṭhitā esā”ti [[ma. ni. aṭṭha. 3. nigamanakathā](#)].

Sāratthappakāsiniṃ nāma saṃyuttanikāyaṭṭhakathaṃ bhadanta**jotipālattherena** āyācito akāsi. Vuttaṃ hetametissā nigamane –

“Etissā karaṇatthaṃ, therena bhadanta**jotipālena**;
Suciṣīlena subhāsītassa pakāsayantañāṇena.

Sāsanavibhūtikāmena, yācamānena maṃ subhaguṇena;
Yaṃ samadhigataṃ puññaṃ, tenāpi jano sukhī bhavatū”ti [[saṃ. ni. aṭṭha. 3.5.nigamanakathā](#)].

Manorathapūraṇiṃ nāma aṅguttaranikāyaṭṭhakathaṃ bhadanta**jotipālattherena** dakkhiṇaindiyaraṭṭhe **kañcipurādīsu** ca sīhaḷadīpe mahāvihāramhi ca attanā saddhiṃ vasantena āyācito, tathā **jīvakenāpi** upāsakena piṭakattayapāragubhūtena vātāhatepi aniñjamānasabhāve dume viya aniñjamānasaddhamme ṭhitena sumatinā parisuddhājīvenābhiyācito akāsi. Vuttaṃ hetametissā nigamane –

“Āyācito sumatinā, therena bhadanta**jotipālena**;
Kañcipurādīsu mayā, pubbe saddhiṃ vasantena.

Varatambapaṇṇidīpe, mahāvihāramhi vasanakālepi;
Vātāhate viya dume, aniñjamānamhi saddhamme.

Pāraṃ piṭakattayasā,garassa gantvā ṭhitena sumatinā;
Parisuddhājīvenā,bhiyācito **jīvakenāpi**.

Dhammakathānayanipuṇehi, dhammakathikehi aparimāṇehi;
Parikīḷitassa paṭīpa,jjitassa sakasamayacitrassa.

Aṭṭhakathaṃ aṅguttara,mahānikāyassa kātumāraddho;
Yamaḥaṃ cirakālaṭṭhiti-micchanto sāsanavarassa.

Sā hi mahāaṭṭhakathāya, sāramādāya niṭṭhitā esā;
Catunnavutiparimāṇāya, pāḷiyā bhāṇavārehi.

Sabbāgamasaṃvaṇṇana, manoratho pūrito ca me yasmā;
Etāya **manoratha pūraṇīti** nāmaṃ tato assā”ti [[a. ni. aṭṭha. 3.11.nigamanakathā](#)].

Imā ca pana catasso āgamaṭṭhakathāyo kurumāno ācariyabuddhaghoso mahāmahindattherenābhattaṃ mūlaṭṭhakathāsāṅkhātaṃ mahāaṭṭhakathāmyeva bhāsāparivattanavasena ceva punappunāgatavittārakathāmagassa saṃkhipanavasena ca akāsi. Vuttañhetam ganthārambhe –

“Sīhaḷadīpaṃ pana ābha,tātha vasinā mahāmahindena;
Ṭhapitā sīhaḷabhāsāya, dīpavāsīnamatthāya.

Apanetvāna tatohaṃ, sīhaḷabhāsaṃ manoramam bhāsaṃ;
Tantīnāyānucchavikaṃ, āropento vigatadosaṃ...pe...
Hitvā punappunāgata-mattham attham pakāsāyissāmi’ ti.

Tathā nigamanepi –

“Sā hi mahāaṭṭhakathāya, sāramādāya niṭṭhitā esā’ ti [dī. ni. aṭṭha. 3.nigamanakathā] ca;
“Mūlaṭṭhakathāsāraṃ, ādāya mayā imaṃ karontenā’ ti [dī. ni. aṭṭha. 3.nigamanakathā] ca.

Imāsaṃ sarīrabhūtapāthesu ca samantapāsādikāyaṃ viya “mahāpaccariyaṃ, kurundiya’ ntiādīnā
vinicchayaṃvaṇṇanābhedaṃpakāsaṃ na dissati, tathā abhidhammaṭṭhakathāsupi. Tenetaṃ nīyati
“suttantābhidhammesu mahāaṭṭhakathāto aññā mahāpaccariādīnāmikā porāṇikā sīhaḷaṭṭhakathāyo ceva
andhakaṭṭhakathā ca natthi’ ti. Yāva vasabharājakālā (609-653) pana pākāṇaṃ sīhaḷikaṭṭherānaṃ
vinicchayo ca vādā ca vatthūni ca etāsupi dissantiyevāti.

Abhidhammaṭṭhakathākaraṇaṃ

Aṭṭhasālīniṃ pana **sammohavinodani**ñca dhātukathādīpañcapakaraṇassa aṭṭhakathāñcāti tisso
abhidhammaṭṭhakathāyo attanā sadisaṇāmena sotatthakāṅganthakāraṇena **buddhaghosa**abhikkhunā
āyācīto akāsi. Vuttañhetam tāsū –

“Visuddhācārasīlena, nipuṇāmalabuddhinā;
Bhikkhunā **buddhaghosena**, sakkaccaṃ abhiyācīto’ ti [dha. sa. aṭṭha. ganthārambhakathā] ca.

“**Buddhaghosoti** garūhi gahitaṇāmadheyyena therena katā
Ayaṃ **aṭṭhasālīni** nāma dhammasaṅgahaṭṭhakathā’ ti [dha. sa. aṭṭha. nigamanakathā] ca.

“Atthappaṅkāsanaṭṭham, tassāhaṃ yācīto ṭhitaguṇena;
Yatinā adandhagatinā, subuddhinā **buddhaghosena**.

Yaṃ ārabhiṃ racayituṃ, aṭṭhakatham sunipuṇesu atthesu;
Sammohavinodanato, **sammohavinodani** nāmā’ ti [vibha. aṭṭha. nigamanakathā] ca.

“**Buddhaghosoti** garūhi gahitaṇāmadheyyena therena katā
Ayaṃ **sammohavinodani** nāma vibhaṅgaṭṭhakathā’ ti [vibha. aṭṭha. nigamanakathā] ca.

Imāsu pana tīsu pañcapakaraṇaṭṭhakathāya nāmaviseso natthi āyācako ca na pakāsīto, kevalam
attano saddhāya eva sañcoditena ācariyabuddhaghosena sā katā viya dissati. Vuttañhetam tassā
nigamane –

“Kusalādidhammabhedam, nissāya nayehi vividhagaṇanehi;
Vīthārento sattama-mabhidhammapakaraṇam satthā.

Suvihitasanniṭṭhāno, paṭṭhānaṃ nāma yaṃ pakāsēsi;
Saddhāya samāradhā, yā aṭṭhakathā mayā tassāti ca.

“Ettāvata

Sattappakaraṇaṃ nātho, abhidhammadesayi;
Devātidevo devānaṃ, devalokamhi yaṃ pure;
Tassa **aṭṭhakathā** esā, sakalassāpi niṭṭhitā”ti [paṭṭhā. aṭṭha. 19-24.1] ca.

“**Buddhaghosoti** garūhi gahitanāmadheyena therena katā
Ayaṃ sakalassāpi **abhidhammapītakassa aṭṭhakathā**”ti [paṭṭhā. aṭṭha. 19-24.1] ca.

Ekacce pana ādhunikā therā “abhidhammaṭṭhakathāyo ācariyabuddhaghosena yācito saṅghapālabuddhamittajotipālādīnaṃ aññataro thero akāsī”ti vadanti. Ayañca nesam vicāraṇā, aṭṭhasālīnisammohavinodanāsu “tā buddhaghosena yācito akāsī”ti ganthakārena vuttaṃ. Tena ñāyati “takkārako añño, ācariyabuddhaghoso pana tāsū yācakapuggaloyevā”ti. Āgamaṭṭhakathāsu ca ācariyabuddhaghosena –

“Sīlakathā dhutadhammā, kammaṭṭhānāni ceva sabbāni...pe...
Iti pana sabbam yasmā, visuddhimagge **mayā** suparisuddham;
Vuttaṃ tasmā bhiyyo, na taṃ idha vicārayissāmī”ti [dī. ni. aṭṭha. 1.ganthārambhakathā] –

Evaṃ sīlakathādīnaṃ **attanā eva** visuddhimagge vuttabhāvo **mayā**tipadena pakāsīto.
Aṭṭhasālīniyaṃ pana –

“Kammaṭṭhānāni sabbāni, cariyābhiññā vipassanā;
Visuddhimagge panidaṃ, yasmā sabbam pakāsīto”nti [dha. sa. aṭṭha. ganthārambhakathā] –

Evaṃ **mayā**ti kattupadena vinā vuttaṃ. Tenāpi ñāyati “visuddhimaggakārako añño, abhidhammaṭṭhakathākārako añño”ti. Kiñcāpi abhidhammaṭṭhakathāsu abhiyācako buddhaghoso bhikkhunāti ca yatināti ca imeheva sāmāññaṅṅapadehi vutto na therenāti sagāravagūṇapadena, tathāpi so “visuddhācārasīlena nipuṇāmalabuddhinā”ti ca, “adandhagatinā subuddhinā”ti ca imehi adhikagūṇapadehi thomitattā “visuddhimaggādikārako ācariyabuddhaghosoyevā”ti sakkā gahetuṃ. So hi upasampannakālatoyeva paṭṭhāya ganthakovidō pariyattivīsāradagūṇasampanno, tasmīñca kāle ūnadasavasso bhavye, tasmā therenāti na vuttoti sakkā gahetunti.

Taṃ pana tesam ativicāraṇamattameva. Na hi ācariyabuddhaghosatthero “tasmim kāle ūnadasavasso”ti sakkā gahetuṃ, visuddhimagganigamanepi “buddhaghosoti garūhi gahitanāmadheyena **therenā**”ti vacanato, na ca “visuddhācārasīlena, nipuṇāmalabuddhinā”ti vā, “adandhagatinā subuddhinā”ti vā ettakeheva dvīhi dvīhi guṇapadehi thomanena suthomito hoti, aññadatthu “nippabhīkatakahajjoto samudeti divākaro”ti thomanam viya hoti. Nanu ācariyena attano ganthanigamanesu –

“Paramavisuddhasaddhābaddhivīriyapaṭimaṇḍitena
sīlācārajjavamaddavādigūṇasamudayasamuditena
sakasamayasamayantaragahanajjhogāhaṇasamatthena paññāveyyattiyasamannāgatena
tipītakapariyattibhede sātṭhakathe satthusāsane appaṭihatañāṇappabhāvena
mahāveyyākaraṇenā”tiadinā –

Attano **anucchavikāni** guṇapadāni pakāsītāni, soyeva ca porāṇasīhaṭṭhakathāyo saṅkhipitvā abhinavasāṅghaṭṭhakathānaṃ **ādikattā pubbaṅgamo**, aññe pana abhinavaṭṭhakathākārā tasseva anuvattitvā avasesamekaṃ vā dve vā aṭṭhakathāyo akāmsu. Abhidhammaṭṭhakathāsu ca yo yo attho visuddhimagge vutto, so so yathānuppattaṭṭhāne tato gahetvā tatheva vutto. Visesato pana paṭiccasamuppādavibhaṅgakhandhāyanadhātusaccavibhaṅgavaṇṇanāsu jhānakathāvaṇṇanāsu ca ayamatto ativiya pākāṭo, yopi ca tattha appako katipayamatto visuddhimaggena visadiso saṃvaṇṇanābhedo dissati, sopi ābhidhammīkānaṃ matānusārena yathā porāṇaṭṭhakathāyaṃ vutto,

tatheva vuttoti veditabbo. Yathā ca aṭṭhasāliniyaṃ samantapāsādikāya vinayaṭṭhakathāya atideso dissati [dha. sa. aṭṭha. 1 akusalakammaphakathā], tatheva samantapāsādikāyampi aṭṭhasāliniyā atideso dissateva [pārā. aṭṭha. 1.11;]. Yadi ca aṭṭhasālinī aññena katā bhaveyya, kathaṃ tāsu aññamaññātideso sakkā kātuṃ. Tasmā abhidhammaṭṭhakathāsu abhiyācako buddhaghoso ācariyena samānanāmo **cūlabuddhaghosoti** yāvajjatanā ācariyaparamparāya gahito **soṭṭhakīganthakārako** aññoyeva, na ācariyamahābuddhaghosattthero. Teneva tatha vuttaṃ “bhikkhunā”ti ca “yatinā”ti ca.

Yadi pana ettakena niṭṭhaṃ na gaccheyya, evampi vicāretabbaṃ – kinnu kho saṅghapālādayo therā visuddhimaggādīnaṃ karaṇatthāya ācariyabuddhaghosatttheraṃ āyācamānā attanā samatthataroti saddahantā āyācanti udāhu asaddahantāti? Saddahantāyeva āyācantīti pākaṭṭhāyeyamattho. Tathā ca sati ācariyabuddhaghosattthero sayam aññehi samatthatarova samāno kasmā aññaṃ āyāceyya. Na hi saddhāsampannassa thāmasampannassa yobbanasampannassa ācariyassa sundaratarāṃ abhidhammaṭṭhakathaṃ kātuṃ bhāriyaṃ bhavissati. Abhidhammaṭṭhakathāsu ca vuttavacanāni visuddhimaggaāgamaṭṭhakathāsu vuttasaṃvaṇṇanāvacanēhi ekākārāneva hontī. Yadi ca abhidhammaṭṭhakathaṃ añño kareyya, kathamapi tāhi vacanākārassa visadisatā bhaveyya eva. Etāsaṃ nigamana ca dassitena “buddhaghosoti garūhi gahitanāmadheyyena therena katā”ti vacanena “ācariyabuddhaghosena katā”tveva pākaṭṭhā hontī, na aññenāti. Yepi “aññena katā”ti vadanti, tepi “iminā nāma therenā”ti ekaṃsato dassetuṃ na sakkonti, tathā dassetuṃca lesamattampi sādhakavacanāṃ na dissati. Tasmā abhidhammaṭṭhakathāyopi idāni ācariyehi **cūlabuddhaghosoti** voharitena **buddhaghosena** nāma bhikkhunāyācīto visuddhimaggavinayāgamaṭṭhakathānaṃ kārako **ācariyamahābuddhaghosattthero**yeva akāsīti niṭṭhamettha gantabbanti.

Yaṃ pana mahāvamse “ācariyabuddhaghoso sīhaḷadīpāgamanato pubbe jambudīpe vasanakāleyeva aṭṭhasāliniṃ akāsī”ti adhippāyena –

225. “Dhammasaṅgaṇiyākāsi, kacchaṃ so aṭṭhasālini”nti –

Vuttaṃ, taṃ idāni dissamānāya aṭṭhasāliniyā na sameti. Tatha hi ganthārambheyyeva visuddhimaggaṃ atidissitvā pacchāpi so ca, samantapāsādikā ca bahūsu ṭhānesu atidissiyanti. Tasmā tassā ācariyena sīhaḷadīpaṃ patvā visuddhimaggañceva samantapāsādikānaṃ katvā pacchāyeva katabhāvo ativiya pākaṭṭhi.

Kaṅkhāvitaraṇiāṭṭhakathākaraṇaṃ

Kaṅkhāvitaraṇiṃ nāma pātimokkhaṭṭhakathaṃ ācariyabuddhaghosattthero **soṇattherena** yācīto mahāvihāravāsīnaṃ vācanāmagganissitaṃ sīhaḷapātimokkhaṭṭhakathānaṃ nissāya ekampi padaṃ pāḷiyā vā mahāvihāravāsīnaṃ porāṇaṭṭhakathāhi vā avirodhetvā akāsi. Tena vuttaṃ tissaṃ aṭṭhakathāyaṃ –

“Sūratena nivātena, sucisallekhavuttinā;
Vinayācārayuttana, **soṇattherena** yācīto.

Tatha saṅjātakāṅkhānaṃ, bhikkhūnaṃ tassa vaṇṇanaṃ;
Kaṅkhāvitaraṇatthāya, paripuṇṇavinicchayaṃ.

Mahāvihāravāsīnaṃ, vācanāmagganissitaṃ;
Vattayissāmi nāmena, **kaṅkhāvitaraṇiṃ** subha”nti [kaṅkhā aṭṭha. ganthārambhakathā] ca.

“Ārabhiṃ yamaṃ sabbam, sīhaḷaṭṭhakathānaṃ;
Mahāvihāravāsīnaṃ, vācanāmagganissitaṃ.

Nissāya sā ayaṃ niṭṭhaṃ, gatā ādāya sabbaso;
Sabbhaṃ aṭṭhakathāsāraṃ, pāḷiyatthañca kevalaṃ.

Na hettha taṃ padaṃ atthi, yaṃ virujjheyya pāḷiyā;
Mahāvihāravāsīnaṃ, porāṇaṭṭhakathāhi vā’’ti [[kaṅkhā. aṭṭha. nigamanakathā](#)] ca.

Dhammapadaṭṭhakathākaraṇaṃ

Aparāpi tisso aṭṭhakathāyo santi khuddakapāṭhaṭṭhakathā dhammapadaṭṭhakathā
suttanipāṭaṭṭhakathā cāti, yā tāsū dissamānanigamanavasena ācariyabuddhaghoseneva katāti paññāyanti.
Tattha pana vuttavacanāni kānici kānici āgamaṭṭhakathāsu vuttākārena na honti. Tasmā eke vadanti
“netā ācariyabuddhaghosassā’’ti. Ekacce pana “ācariyassa upathambhakattherehi paṭhamam katā,
pacchā ācariyena osānasodhanavasena pariyosāpitā vā bhaveyyuṃ, abhidhammaṭṭhakathaṃ āyācanta
cūḷabuddhaghosena vā katā bhaveyyu’’nti vadanti.

Taṃ tathā vā hotu aññathā vā, idāni ekantato vinicchinituṃ na sukameva. Tasmā tāsam
nigamanavacanavaseneva ettha pakāsayissāma. Tāsū hi **dhammapadaṭṭhakathaṃ**
kumārakassapatherena āyācito **sirikūṭassa** (sirikuḍḍassa) rañño pāsāde viharanto paramparābhatam
sīhaḷabhāsāya saṅghitam porāṇaṭṭhakathaṃ pāḷibhāsāya āropetvā vitthāragatañca vacanakkamaṃ
samāsetvā gāthāsu asaṃvaṇṇitapadabyañjanāni saṃvaṇṇetvā akāsi. Vuttañhi tattha ganthārambhe –

“Paramparābhatā tassa, nipuṇā atthavaṇṇanā;
Yā tambapaṇṇidīpamhi, dīpabhāsāya saṅghitā...pe...

Kumārakassapenāhaṃ, therena thiracetasā;
Saddhammaṭṭhitikāmena, sakkaccaṃ abhiyācito...pe...

Taṃ bhāsaṃ ativithāra, gatañca vacanakkamaṃ;
Pahāyāropayitvāna, tantibhāsaṃ manoramaṃ.

Gāthānaṃ byañjanapadaṃ, yaṃ tattha na vibhāvitam;
Kevalaṃ taṃ vibhāvetvā, sesaṃ tameva atthato.

Bhāsantarena bhāsissa’’nti [[dha. pa. aṭṭha. 1.ganthārambhakathā](#)] –

Nigamane ca vuttaṃ –

“Vihāre adhirājena, kāritamhi kataññunā;
Pāsāde **sirikūṭassa**, rañño viharatā mayā’’ti [[dha. pa. aṭṭha. 2.nigamanakathā](#)].

Ettha ca **sirikūṭo** nāma samantapāsādikānigamane **siripāloti** vutto **mahānāmoyeva** rājāti vadanti.
Evaṃ sati mahesiyā ānayaṃ samādāpanamārabha tena raññā dinne dhūmarakkhapabbatavihāre
vasantena sā katāti veditabbā. Vuttañhetam mahāvamse –

37-212 Lohadvāra-ralaggāma-koṭipassāvanavhaye;
Tayo vihāre kāretvā, bhikkhūnaṃ abhayuttare.

213. Vihāraṃ kārayitvāna, dhūmarakkhamhi pabbate;
Mahesiyā’nayenā’dā, bhikkhūnaṃ theravādina’’nti.

Tassa pana rañño kāle sā niṭṭhāpitāti na sakkā gahetuṃ. Tassa hi rañño ekavīsatiṃvavasse samantapāsādikaṃ niṭṭhāpesi. So ca rājā dvāvīsatiṃvavasse divaṅgato. Etthantare sādhiṃkaekavassena “catasso ca āgamaṭṭhakathāyo tisso ca abhidhammaṭṭhakathāyo ayañca dhammapadaṭṭhakathā”ti sabbā etā na sakkā niṭṭhāpetunti.

Paramatthajotikāṭṭhakathākaraṇaṃ

Paramatthajotikaṃ nāma khuddakapāṭhassa ceva suttanipātassa ca aṭṭhakathaṃ kenacipi anāyācīto attano icchāvaseneva akāsi. Vuttañhettaṃ khuddakapāṭṭhakathāya ganthārambhe –

“Uttamaṃ vandaneyyānaṃ, vanditvā ratanattayaṃ;
Khuddakānaṃ karissāmi, kesañci atthavaṇṇanaṃ.

Khuddakānaṃ gambhīrattā, kiñcāpi atidukkarā;
Vaṇṇanā mādisenesā, abodhantena sāsanaṃ.

Ajjāpi tu abbhocchinno, pubbācariyanicchayo;
Tattheva ca ṭhitaṃ yasmā, navaṅgaṃ satthusāsanaṃ.

Tasmāhaṃ kātumicchāmi, atthasaṃvaṇṇanaṃ imaṃ;
Sāsanañceva nissāya, porāṇaṅca vinicchayaṃ.

Saddhammahumānena, nāttukkaṃsanakamyatā;
Nāñhesaṃ vambhanatthāya, taṃ suṇātha samāhitā”ti.

Bahū pana vicakkhaṇā imā ārambhagāthāyo vicinitvā “nettaṃ ācariyabuddhaghosattatherassa viya vacanaṃ hoti”ti vadanti. Ayañca nesaṃ vicinanākāro, ācariyabuddhaghoso hi yaṃ kañci ganthaṃ silādiguṇasampannena aññena āyācītova karoti, idha pana kocipi āyācako natthi. Punapi ācariyo “porāṇasihaḷaṭṭhakathaṃ bhāsāparivattanavasena karissāmī”ti ca “mahāvihāravāsīnaṃ vācanāmaggaṃ nissāya karissāmī”ti ca evaṃ paṭiññaṃ katvāva karoti, idha pana tādisipi paṭiñña natthi. Punapi ācariyo atigambhīratthānaṃ catunnañcāgamānaṃ abhidhammassa ca saṃvaṇṇanārambhepi dukkarabhāvaṃ na katheti, idha pana “sāsanaṃ abodhantena mādisenā”ti attanā sāsanaṃ abuddhabhāvaṃ pakāsetvā “atidukkarā”ti ca katheti. Tasmā “nettaṃ ācariyabuddhaghosassa viya vacana”nti vadanti. Taṃ yuttaṃ viya dissati, ācariyo hi attano ganthanigamanesu “tipiṭakapariyattippabhede sātṭhakathe satthusāsane appaṭihatañāṇappabhāvenā”ti attano ñāṇappabhāvaṃ pakāsesi, so “sāsanaṃ abodhantena mādisena atidukkarā”ti idisaṃ vacanaṃ na katheyayevāti.

Jātaḷaṭṭhakathākaraṇaṃ

Jātaḷaṭṭhakathāpi ca ācariyabuddhaghosattathereneva katāti vadanti, kāraṇaṃ panettha na dissati. Sā pana **atthadassittherena** ca **buddhamittattherena** ca **mahisāsakanikāyikena** ca **buddhadevattherenā**ti tīhi therehi abhiyācīto mahāvihāravāsīnaṃ vācanāmaggaṃ nissāya katā. Imissāpi nāmaviseso natthi. Vuttaṃ himissā ārambhe –

“Buddhavaṃsassa etassa, icchantena ciraṭṭhitim;
Yācīto abhigantvāna, therena **atthadassinā**.

Asaṃsaṭṭhavihārena, sadā suddhavihārinā;
Tattheva **buddhamittena**, santacittena viññunā.

Mahisāsakavaṃsamhi, sambhūtena nayaññunā;
Buddhadevena ca tathā, bhikkhunā suddhabuddhinā.

Mahāpurisacariyānaṃ, ānubhāvaṃ acintiyāṃ;
 Tassa vijjotayantassa, jātakassatthavaṇṇanaṃ.

Mahāvihāravāsīnaṃ, vācanāmagganissitaṃ;
 Bhāsissaṃ bhāsato taṃ me, sādhu gaṇhantu sādhave’’ti.

Ettāvatā ca ācariyabuddhaghosattherassa ganthabhāvena pākaṭāhi sabbatṭhakathāhi saha visuddhimaggassa karaṇappakāro vitthārena vibhāvito hoti.

Sakalalokapatthārakāraṇaṃ

Kissesa visuddhimaggo sakalaloke patthaṭoti? Parisuddhapiṭakapāḷinissayabhāvato, sikkhattayaśaṅgahabhāvato, porāṇatṭhakathānaṃ bhāsāparivattanabhāvato, parasamayavivajjanato, sakasamayavisuddhito, sīladhutaṅgasamathaabhiññāpaññāpabhedādīnaṃ paripuṇṇavibhāgato, yāva arahattā paṭipattinayaparidīpanato, uttānānākulapadabyañjanasaṅkhatabhāvato, suviññeyyatthabhāvato, pasādanīyānaṃ diṭṭhānugatāpādanasamatthānaṃ vatthūnañca dīpanatoti evamādīhi anekasatehi guṇehi esa sakalaloke patthaṭo jāto.

Ayañhi visuddhimaggo saṅgītittayārūḷhaparissuddhapāḷipiṭakameva nissāya pavatto, na mahāsaṅghikādīnaṃ sattarasannaṃ nikāyānaṃ piṭakaṃ, napi mahāyānikānaṃ piṭakaṃ. Saparivāraṃ sikkhattayañca ettha paripuṇṇameva saṅgahetvā dassitaṃ. Vuttañhetvaṃ ācariyena āgamaṭṭhakathāsu ganthārambhe –

‘‘Sīlakatā dhutadhammā, kammaṭṭhānāni ceva sabbāni;
 Cariyāvidhānasahito, jhānasamāpattivitthāro.

Sabbā ca abhiññāyo, paññāsaṅkalananicchayo ceva;
 Khandhādhatāyatani,ndriyāni ariyāni ceva cattāri.

Saccāni paccayākāra,desanā suparisuddhanipuṇanayā;
 Avimuttatantimaggā, vipassanābhāvanā ceva.

Iti pana sabbam yasmā, visuddhimagge mayā suparisuddham;
 Vuttaṃ tasmā bhiyyo, na taṃ idha vicārayissāmī’’ti.

Yasmā pana visuddhimaggo catunnaṃ āgamaṭṭhakathānaṃ avayavabhāvena kato, tasmā tā viya porāṇasīhaḷaṭṭhakathānaṃ bhāsāparivattanasena ceva punappunāgatamatthānaṃ saṃkhipanasena ca parasamayavivajjanavasena ca mahāvihāravāsīnaṃ parisuddhavinicchayasāṅkhātassa sakasamayassa dīpanavasena ca kato. Vuttañhetvaṃ ācariyena –

‘‘Apanetvāna tatoham, sīhaḷabhāsaṃ manoramaṃ bhāsaṃ;
 Tantiyānucchavikaṃ, āropento vigatadosaṃ.

Samayaṃ avilomanto, therānaṃ theravaṃsapadīpānaṃ;
 Sunipuṇavinicchayānaṃ, mahāvihāre nivāsīnaṃ;
 Hitvā punappunāgata-mattham attham pakāsāyissāmī’’ti [dī. ni. aṭṭha. 1.ganthārambhakathā]
 ca.

“Majjhe visuddhimaggo, esa catunnampi āgamānañhi;
Ṭhatvā pakāsayissati, tattha yathābhāsitaṃmatthaṃ.

Iceva kato tasmā, tampi gahetvāna saddhimetāya;
Aṭṭhakathāya vijānatha, dīghāgamanissitaṃ attha’nti [dī. ni. aṭṭha. 1.ganthārambhakathā] ca.

“Sā hi mahāaṭṭhakathāya, sāramādāya niṭṭhitā esā;
Ekāsītipamāṇāya, pāḷiyā bhāṇavārehi.

Ekūnasatṭhimatto, visuddhimaggopi bhāṇavārehi;
Atthappakāsanatthāya, āgamānaṃ kato yasmā.

Tasmā tena sahāyaṃ, aṭṭhakathā bhāṇavāragāṇāyā;
Suparimitaparicchinnāṃ, cattālīsaṃ sataṃ hoti’nti [dī. ni. aṭṭha. 3.nigamanakathā] ca.

Yadi cāyaṃ visuddhimaggo ācariyena āgamaṭṭhakathāyo viya akatvā porāṇasīhaḷaṭṭhakathāyo ca anoloketvā kevalaṃ attano ñāṇappabhāveneva kato assa, nāyaṃ āgamaṭṭhakathānaṃ avayavoti gahetabbo assa, aññadatthu “āgamaṭṭhakathāyo mahāṭṭhakathāya sārabhūtā, visuddhimaggo pana na tassā sārabhūto, kevalaṃ ācariyassa matiyāva kato’nti evameva vattabbo assa. Yasmā pana tathā akatvā pubbe vuttappakāreneva kato, tasmā ayampi visuddhimaggo tāsāṃ āgamaṭṭhakathānaṃ karaṇākāreneva katoti ca, tatoyeva mahāṭṭhakathāya sārabhūtoti ca daṭṭhabbo.

Ekacce pana vicakkhaṇā ācariyabuddhaghosassa ganthesu uttarapakkhasāsānikānaṃ assaghosānāgajjunavasubandhuādīnaṃ bhikkhūnaṃ viya porāṇaganthe anissāya attano ñāṇeneva takketvā dassitaṃ dhammakathāvīsesaṃ adisvā asantuṭṭhacittā evaṃ vadanti “buddhaghosassa aññaṃ anissāya attano ñāṇappabhāveneva abhinavaganthuppādānaṃ na passāmā’nti. Taṃ tesāṃ garahāvacaṇampi samānaṃ theravādīnaṃ **pasamsāvacaṇameva** sampajjati. Theravādino hi evaṃ jānanti “buddheneva bhagavatā sammāsambuddhena desetabbo ceva dhammo paññāpetabbo ca vinayo anavasesena desito ceva paññatto ca, soyeva dhammavinayo saddhāsampannehi bhikkhūhi ceva gahaṭṭhehi ca yathārahaṃ paṭipajjitabbo, na tato añño dhammavinayo takketvā gavesetabbo. Yadi pana añño dhammavinayo kenaci takketvā kathito assa, taṃ tasseva takkino sāsanaṃ hoti na satthu sāsanaṃ. Yaṃ yaṃ pana bhagavato dhammavinaye padabyañjanaṃ atthato apākaṭaṃ hoti, tattha tattha porāṇakehi paṭisambhidāchaḷabhiññādiguṇasampannehi bhagavato adhippāyaṃ jānantehi aṭṭhakathācariyehi saṃvaṇṇitanayena attho gahetabbo, na attanomativasenā’nti. Ācariyabuddhaghoso ca tesāṃ theravādīnaṃ aññataro, sopi tatheva jānāti. Vuttañcetāṃ ācariyena –

“Buddhena dhammo vinayo ca vutto,
Yo tassa puttehi tatheva ñāto;
So yehi tesāṃ matimaccajāntā,
Yasmā pure aṭṭhakathā akāṃsu.

Tasmā hi yaṃ aṭṭhakathāsu vuttaṃ,
Taṃ vajjayitvāna pamādalekhaṃ;
Sabbampi sikkhāsu sagāravānaṃ,
Yasmā pamānaṃ idha paṇḍitānaṃ.

Tato ca bhāsantameva hitvā,
Vitthāramaggañca samāsāyitvā...pe...
Yasmā ayaṃ hessati vaṇṇanāpi,
Sakkacca tasmā anusikkhitabbā’nti [pārā. aṭṭha. 1.ganthārambhakathā].

Teneva ācariyo bhagavato dhammavinayaṃ vā porāṇaṭṭhakathaṃ vā anissāya attano ñāṇena takketvā vā attanā paricitalokiyaganthehi gahetvā vā na kañci ganthaṃ akāsi. Yadi pana tādisaṃ kareyya, taṃ theravādino **mahāpadesasutte** [dī. ni. 2.188; a. ni. 4.180] vuttanayena “addhā idaṃ na ceva tassa bhagavato vacanaṃ, buddhaghosassa ca therassa duggahita”nti chaḍḍeyyumuṃyeva. Yato ca kho ayaṃ visuddhimaggo porāṇaṭṭhakathānaṃ bhāsāparivattanādivaseneva ācariyena kato, tatoyeva theravādino taṃ **mahāpadesasutte** vuttanayena “addhā idaṃ tassa bhagavato vacanaṃ, ācariyabuddhaghosassa ca therassa suggahita”nti sampaticchanti. Tenāpāyaṃ sakalaloke patthaṭo hoti.

Sīladhutaṅgādīnaṃ vibhāgo ca paṭipattinayaparidīpanaṅca pākaṭameva. Tathāyaṃ visuddhimaggo suviññeyyapadavākyehi ceva anākulapadavākyehi ca tantinayānurūpāya pāḷigatiyā suṭṭhu saṅkhato, tatoyeva cassa atthopi suviññeyyo hoti. Tasmā taṃ oloketā viññuno visuddhajjhāsayaṃ khaṇe khaṇe atthapaṭisaṃvedino ceva dhammapaṭisaṃvedino ca hutvā anappakaṃ pītisomanassaṃ paṭisaṃvedenti.

Anekāni cettha pasādāvahāni **mahātissattheravattuādīni** [visuddhi. 1.15] sīhaḷavattūni ca **dhammasenāpatisāriputtattheravattuādīni** [visuddhi. 1.19] jambudīpavattūni ca dīpitāni. Tāni passivā anussarantānaṃ sappurisānaṃ balavapasādo ca uppajjati, “kadā nu kho mayampi īdisā bhavissāmā”ti diṭṭhānugatiṃ āpajjitukāmatā ca uppajjati.

Evaṃ parisuddhapiṭakapāḷinissayatādīhi anekasatehi guṇehi ayaṃ visuddhimaggo sakalaloke patthaṭo jātoti veditabbo. Yathā cāyaṃ visuddhimaggo, evaṃ aññāpi ācariyena katā ṭiṭṭakasaṅgahaṭṭhakathāyo porāṇaṭṭhakathānaṃ bhāsāparivattanabhāvādīhi guṇehi sakalaloke patthaṭāyeva honti.

Ettāvatā ca pana kimatthaṃ katotiādīnampi pañhānamattho vitthārena vibhāvitova hotīti.

Tatthetaṃ vuccati –

1. Sambhāvanīyassa sudhīvarāna-
Mādattadhīriṭṭhapadassa yassa;
Paññādiḷatā lalitā guṇābhā,
Bhāteva lokamhi satam mudāya.
2. Sa **buddhaghosā**vhathiraggadhīmā,
Vidūna'maccantasamādarā'dā;
Sabhāvajaṃ byattisasattiladdham,
Siriṃ dadhāteva subuddhaghoso.
3. “Sambuddhaseṭṭhe parinibbutasmim,
Saṃvaccharānaṃ dasame satamhi;
Jāto”ti ñāto vibudhehi buddha-
Ghosānkuro pattasamattamānī.
4. Viññū vidū'massa pumaggajāte,
Sañjātataṃ dakkhiṇadesabhāge;
Ramme'ndiyasmim sujanākarasmim,
Tattatthamesīna'mayaṃ patīti.
5. **Moraṇḍagāmamhi** sa tatha jāto,
Puññānito vippakulamhi sammā;
Sūrassa lokatthasamāvahatthaṃ,
Uppajjanāyā'dyaruṇova raṃsi.

6. Saṃvaddhabuddhī sa pavuddhipatto,
Ārādhayaṃ ñātigaṇaṃ sadeva;
Vedesu vijjāsu tadaññasippa-
Ganthesvanāyāsapavīṇatā' gā.
7. Suddhādhimuttīna vivecanena,
Sārānu'sāroti viviñcamāno;
Vedesva'sāratta'mabujjhi yasmā,
Tuṭṭhiṃ sa nāpajji sutena sena.
8. Anvesato tassa pasatthasāraṃ,
Saddhammasāro savanena laddho;
Ninnova buddhassa sa sāsanaṃhi,
Ussāhajāto' pagamāya tattha.
9. Dhammābhilāsī sa viroci tattha,
Saṃladdhapabbajjupasampadova;
There' pasāṅkamma **visuddhathera-**
Vādīnikāyamhi patītapaññe.
10. Tadā hi'suṃ **dakkhīṇandiyamhi**,
Nivāsino theriyavaṃsajātā;
Tadaññavādī ca munī muninda-
Matam yathāladdhi pakāsayantā.
11. Saddhammasārādhigamāya bhiyyo,
Pāḷiṃ samuggaṇhi jineritam, sā;
Jivhaggalilā manasā'sitā'ssa,
Lakkhīva puññe nivasam babbhāsa.
12. Evaṃ tamuggaṇha'mabodhi sammā,
"Ekāyanoyaṃ suvisuddhiyāti;
Maggo vivaṭṭādhigamāya" tattho-
Yyogaṃ samāpajji param parattī.
13. Sabhāvapaññā mahatī ca sattha-
Ntaropaladdhā vipulāva vijjā;
Tenassa buddhottisamuddatiṇṇe,
Akicchasādhittapabhāva'maññā.
14. Buddhassa kittīva sukittighoso,
Vattissate'ccassa garū viyattā;
Atthānviṭam nāmamakamsu **buddha-**
Ghosoti sambuddhamataṅgatassa.
15. **Mayūradūtavhayapaṭṭanasmiṃ**,
Nivassa **kañjīvhapurādike** ca;
Sa **andhakākhyātasadesiyaṭṭha-**
Katham samuggaṇhi samāhitatto.
16. Tāvattakenassa sumedhasassā-
Santuṭṭhacittassa tatuttarimpi;

Sambuddhavāṇīsu samattamatthaṃ,
Aññātumicchā mahatī ajāyi.

17. **Mahāmahindā**divasīvarebhi,
Samābhatā yā**ṭṭhakathā** sasārā;
Satheravādā suvinicchayā ca,
Tadā vibhātā vata **laṅkayā**'suṃ.
18. Pavattimetam vidiya'ssa meta-
Dahosi "yaṃ nūna'bhirāmalaṅkaṃ;
Alaṅkarontiṃ ratanākaraṃva,
Upecca sikkhe'ṭṭhakathā mahantī.
19. Tā bhāsayā sīhaḷikāya raccā,
Tantiṃ samāropya navam kareyyam;
Evañhi desantariyāna buddha-
Mānīnamatthaṃ khalu sādhave''ti.
20. Pure ca laṅkāgatasāsaṇaṃ yaṃ,
Sunimmalindūva himādimutto;
Pabhāsi, kismiñci tadāññavāda-
Manākulaṃ tā'kulataṃ jagāma.
21. Jinamhi nibbānagate hi vassa-
Satantare sāsanikā samaggā;
Samānavādā jinasāsaṇamhi,
Na koci bhedopi tadā ahosi.
22. Pacchā ca saddhammadumāhatebhya-
Dhammehi vātehi paṭicca pāpe;
Jātehi saṃviggamanā samāya,
There'sa'muyyogamakamsu daḷham.
23. **Saṅgītiyo** kacca supesalehi,
Niggayhamānāpi thirehi daḷham;
Chinnāpi rukkhā'ssu punoruhāvā-
Kāsuṃva dhammaṃ vinayā'ññathā te.
24. Nānāgaṇā te ca anekavādā,
Saṃsaggakārā jinasāsane'suṃ;
Vādebhi aññehi jineritebhya-
Suddhāyamānā vinayañca dhammaṃ.
25. Vādā ca vādī piṭakāni tesam,
Laṅkaṃ malaṅkaṃva karaṃ'payātā;
Paṭiggahesuṃ pya**bhayādivāsī**,
Nāññe **mahākhyātavihāravāsī**.
26. Yathā ca buddhābhihitāva pāḷi,
Tadatthasārā ca vasībhi nātā;
Na "tedha vokkamma visuddhathera-
Vādī vivādī''ti pavatti kāci.

27. Jīvaṃva rakkhimsu satheravādaṃ,
Tantiṃ tadatthañca saniṇṇayaṃ te;
Tasmā na sakkāva tadaññavādi-
Vādebhi hantuṃ cu' pagantumaddhā.
28. Taṃvādasambhedabhayañca maññayā,
“Duddhāavelāpi bhayehi tantinaṃ;
Sammohatādīhi bhavē”ti **potthakaṃ**,
Āropya sammā paripālayimsu te.
29. Tadā hi tesam paṭibāhane raṇa-
Vidaṃva sikkhaṃ jinasāsanaddharo;
Sa **buddhaghoso** muni buddhipāṭavo,
Gato'si **dīpaṃ** varatambapaṇṇikaṃ.
30. Laṅkaṃ upecca sa mahāṭṭhakathāṇṇavassa,
Pāraṃ paraṃ vitarāṇe thiraniṇṇayova;
Saṃsuddhavaṃsajanivāsamahāvihāra-
Māgā'mbaramva udayindu' pasobhayanto.
31. Tasmiñca dakkhiṇadisāya vasī sa tattha,
Sobhaṃ **padhānaghara**saññitapārivenaṃ;
Pāsāda'muttama'makā sujanebhi sebyaṃ,
Santo **mahānigamasāmi** suciṇṇadhammo.
32. Sammā ca yogamakarī budhabuddhamitta-
Therādi'manta'mupayāta'manūnatante;
Saṃsevito vividhañāyapabuddhiyā so,
Suttābhidhammavinayaṭṭhakathāsva'nūnaṃ.
33. Veyyattiyam'sa samaye samayantare ca,
Paññāya disva vivaṭaṃva nihītamatthaṃ;
Therā samaggajinamaggamatā'matāsī,
Maññimsu naggharatanaṃva sudullabhanti.
34. Viññāya dhammavinayatthayathicchadāne,
Cintāmaṇṭi sunirūpitabuddhirūpaṃ;
Yasse'ttha nicchitamano kavisaṅghapāla-
Ttheruttamo janahitāya niyojayī taṃ.
35. “Kiñcāpi santi vividhā paṭipattiganthā,
Kesañci kiñci tu na buddhamatānusāraṃ;
Saṃsuddhatherasamayehi ca te viruddhā,
Tasmā karotu vimalaṃ paṭipattiganthaṃ”.
36. Mettādayambudavanaṃ janabhūmiyaṃ'sa,
Saṃvassate ca'riyamaggagamagga'maggaṃ;
Saṃsodhanattha'miti “patthitatheraāsaṃ,
Pūressa'meta'miti kāsī visuddhimaggaṃ.
37. Vīrānukampasatiyojitabuddhimā saṃ,
Oggayha, gayha ca' khilaṭṭhakathā satantī;

Sāraṃ sakheda'manapekkhiya sādhukaṃ sa,
Yaṃ'kāsi, kaṃ nu'dha na rocayate budhaṃ so.

38. Vutte'ttha bhāvaparamāva sabhāvadhammā,
Vatthū ca pītisukhavedaniyā'nitāva;
Puṇṇova sabbapaṭipattinayehi ceso,
Pupphābhiphullapavanamva virājate'yaṃ.
39. Yaṃ passiyāna parikappiya ratnasāra-
Gabbhaṃ visuddhi'mabhiyātu'mapekkhamānā;
Taṃ sāra'mādiyitu'māsu payuttayuttā,
Disvā hi naggharatanam nanu vajjaye na.
40. Kantā padāvali'ha tantinayānusārā,
Sārātisāranayapanti pasiddhasiddhā;
Atthā ca santinugamāya tulāyamāno-
Yyogena mettha hi vinā paṭipatti kā'ññā.
41. Ābhāti satthu caturāgamamajjhago'yaṃ-
Atthe pakāsayaḥ bhāṇuva nekadabbe;
Medhāvīpītijananam'sa vidhāna'metaṃ-
Tītañhi yāva kavigocara'massa ñāṇam.
42. Diṭṭhāva tikkhamati'massa **visuddhimagga-**
Sampādanena samupāttasudhīpadebhi;
Tenassa buddhavacanatthavibhāvanāya,
Pabyattasatti veditā veditāgamehi.
43. Khyātam kavībhi'dhigatam yasa'māvahena,
Therassa suddhamatib**buddhasirī**vhayassa;
Lokattha'māvikatapatthana'mādiyāna,
Sāmañca ninnahadayena janāna'matthe.
44. Sambuddhabhāvaviditeni'minā **samanta-**
Pāsādikāvhavinayaṭṭhakathā paṇīṭā;
Sūro'dite viya tayā vinayatthamūlḥā-
Mūlḥī bhavanti jinanītipathā'dhigantvā.
45. **Laṅkā** alaṅkatikatāva **mahāmahinda-**
Ttherena yā ca **vinayaṭṭhakathā**'bhatā, taṃ;
Kantāya sīhaḷagirāya girāyamānā,
Accantakantabahulā munayo purā'suṃ.
46. Aññā ca **paccari-kurundi**samaññitādī,
Dīpaṃ padīpakaraṇī vinayamhi yā'suṃ;
Saṅgayha tāsā'makhilatthanaye ca thera-
Vāde ca muttaratanāniva mekasutte.
47. Tāheva sīhaḷaniruttiyutañca tantim,
Āropiyāna ruciraṃ atha vitthatañca;
Maggam samāsanavasena yathā samatta-
Lokena yā garukatā katamānanā'kā.

48. Suddhanvayāgathavirā ca **visuddhathera-**
Vādī visuddhavinayāgamapujjadhammā;
Suddhaṃ karimṣu na yatthe'nti tadaññāvādā,
Iccādi'māvikariyā'si **nidānamettha**.
49. **Yasmiṃ** manuññapadapanti subhā subodhā,
Atthā ca pītisama'vimhayatādibhāvī;
Citrā vicitramatijā kaviccittahaṃsā,
Tasmā rasāyati tadatthanusāriṇaṃ **yaṃ**.
50. Accantasāgaranibhā vividhā nayatthā,
Sante'ttha yā'su vinayaṭṭhakathā purāṇā;
Tāsaṃ yathābhimatapanti sutantikattaṃ,
Kiñhi'ssa kiñci balavīra'paṭicca kātumaṃ.
51. Uyyoga'massa karuṇāpahitaṃ paṭicca,
Paññāsahāyasahitaṃ balavañca daḷhaṃ;
Laddhāva yā nikhilalokamanuññabhūtā,
Medhāviṇaṃ'nusabhagāva virājate sā.
52. Viññūbhi yā “vinayasāgarapāraṭiṇṇe’”,
Sambhāvitā “sutaraṇāyati sīghavāhā’”;
Iccābhimānitaḡuṇā'jja rarāja yāva,
Kiṃ yaṃ thiraṃ lahu vinassati duppasayaṃ.
53. “Yā byāpinī'khilanayassa subodhinī ca,
Sotūbhi sevitasadātanadhammaraṅgaṃ;
Kativāna lokapahite saḡuṇe dadhantī,
Ṭhātū'ti naṭṭha'mupagā'ṭṭhakathā purāṇā.
54. Janābhisattāya dayāya codito,
Vichejja khedaṃ vinayamhi sādhuṇaṃ;
Athāgamāna'ṭṭhakathāvidhānane,
Dhuraṃ dadhātumaṃ'bhimukhā'si so sudhī.
55. Padmaṃva phullābhinataṃ subhāṇubhaṃ,
Laddhāna phullaṃ'tisayā'si cetanā;
Dāṭhādīnāgena thiraggadhīmatā,
Yā patthitā'rabbha tadatthasijjhane.
56. Dīghāgamatthesu sabuddhivikkama-
Māgama sārādhigamā **sumaṅgala-**
Nāmānugantāva **vilāsinī**ti yā,
Saṃvaṇṇanā lokahitāya sambhavī.
57. Gambhīramedhāvisayāgamamhipi,
Ārabbha buddhiṃ'sa sunimmaḷīkatā;
Viññātabuddhābhimatā bahū janā,
Aññatthasādhā mahatañhi buddhiyo.
58. Sā'nītavidvākkhimanā manāyitā,
Kantāgame dhammasabhāyate sadā;

Teneva maññe'ha tirokatā tayā,
Kiṃ sīghaga'ññatra pathaññagāmikā.

59. Patvā mahantā'mbara'mambudo yathā,
Lokatthasādhīpi mahāsayaṃ mati;
Tasmā'ssa siddhā'tthakathāparamparā,
Buddhippadānāya' huvuṃ navā navā.
60. **Buddhādimittaṃ** thiraseṭṭha'muddisaṃ,
Saṃvaṇṇanā cāsi **papañcasūdanī**;
“Sabbatthasāre jinamajjhimāgame,
Laddhāna pītiṃ sujanā samentu'ti.
61. Uppajji “**sāratthapakāsini**”ti yā,
Sā **jotipālassa** yathābhilāsitaṃ;
Lokaṃ yathānāmikasāradīpanā,
Bhātā'si sammāpaṭipannapanthadā.
62. Sampūri kātuṃ'sa manoratho yayā,
Aṅguttarantāgamamatthavaṇṇanā;
Tannāmadheyyaṃ sujanañca **jīvakam**,
So **jotipāla**ñca pasatthadhītiṃ.
63. Uddissa yaṃ'kāsi pavīṇataṃ karaṃ,
Buddhādisaṃsebyasumaggadassane;
Saddhammapupphāna' vanāyitā'si sā,
Vidvālisaṅghassa sadāvagāhaṇā.
64. Yena'ttaladdhiṃ pajahantu sādhave,
Dubbohadhamme ca sabhāvadīpane;
Bujjhantu, iccāsi'bhidhammasāgaro,
Tatthā'vatāraṃ sukarena sādhinī.
65. Medhāvilāsā'ssa'huvu'tthasālinī,
Kantā ca **sammohavinodanī**ti yā;
Tā **buddhaghosoti** satulyanāmika-
Māgamma jātā sujanatthasādhinī.
66. Aññā ca **pañcaṭṭhakathā**'bhidhammaje,
Bhāve nidhāye'ttha yathā'ssu suttarā;
Gambhīramatthesu paviddhabuddhitā,
Sampādanī satthu'tulattadīpanī.
67. **Soṇā**vhatherassa paṭicca yācanaṃ,
Tā yāya kaṅkhā vitaranti bhikkhavo;
Yā pātimokkhamhi, tadanvayāvhayāṃ,
Saṃvaṇṇanaṃ'kāsi sa dhīmataṃ varo.
68. Samattalokaṭṭhavibhāvirañjanā,
Kate'minā **dhammapadassa** vaṇṇanā;
Thiraṃ samuddissa **kumārakassapaṃ**,
Sataṃ manaṃ pītipaphullitaṃ yayā.

69. Aññā'ssa yā suttanipāta-khuddaka-
Pāṭhatthadātā **paramatthajotikā**;
Saṃvaṇṇanā **jātakatanti** maṇḍanā,
Tā honti lokassa hitappadīpinī.
70. Nissesalokamhi pacāraṇicchā,
Laṅkāgatāna'tṭhakathāna'maddhā;
Yā theravādīna'mapūri buddha-
Ghosaggatherassa pabhāvaladdhā.
71. Bhaddaṃ'sa nāmañca, guṇā manuññā,
Samaggagāmī'nukaronti tesam;
Sasaṅkasūrā hi sadātanā ye,
Lokaṃ pamodañca karaṃ caranti.
72. **Subuddhaghosassa** vibhāvisatti-
Pabyatti'mārabbha thirāsabhassa;
Samaggaloko hi sutheravāde,
Mānaṃ pavaḍḍhesi anaññajātaṃ.
73. **Buddhoti** nāmaṃ bhuvanamhi yāva,
Subuddhaghosassa siyā na kiñhi;
Laddhā hi sādhubhi mahopakārā,
Mahagghavittāniva taṃsakāsā.
74. Khīyetha vaṇṇo na samuddhaṭopi,
Nanva'ssa nekā hi guṇā anantā;
Ko nu'ddhareyyā' khilasāgarode,
Tathāpi maññantu sudhī sadā teti.

Chaṭṭhasaṅgītibhāranitthārakasaṅghasamitiyā pakāsītāyaṃ

Visuddhimagganidānakathā niṭṭhitā.